

H. Eccl.
642
y






Bibliotheca Palatina

4^o H. Eccl. 642 $\frac{1}{2}$ in 4^{to} Quirinus

~~V. 2531~~



**DE GESTIS
PAULI III. FARNESII**

Primo ejus Pontificatus Quinquennio.


R

B R I X I A E

Excusavit JOHANNES-MARIA RIZZARDI.

MDCCXLV.


INFERIORUM APPROBATIONE.



DE GESTIS
PAULI III FARNESII
Primo eius Pontificatus Quinquennio.

I M A G O
OPTIMI SAPIENTISSIMIQUE PONTIFICIS
EXPRESSA IN GESTIS
PAULI III. FARNESII

AD PRIMOS TANTUM QUINQUE ANNOS
EJUS PONTIFICATUS SPECTANTIBUS
Quos nimirum exhibent Monumenta in primo & altero
CARDINALIS REGINALDI POLI
Epistolarum Collectionis Volumine
comprehensa.



B R I X I A E
Excudebat JOANNES-MARIA RIZZARDI.
C I O I O C C X L V .
SUPERIORUM APPROBATIONE.

I M A C O M O
 OPTIMI SAPIENTISSIMIQUE PONTIFICIS
 EXPRESSA IN GESTIS
 PAULI III FARNESEII
 AD PRIMOS TANTUM QUINQUE ANNOS
 EJUS PONTIFICATUS SPECTANTIBUS
 Quos nimirum exhibet in primo & altero
 CARDINALIS ALDIPOLI
 Epistolarum Collectionis Volumine
 comprehensa.




BRIXIAE
 Excudebat Joannes-Maria Rizzardi.
 MDCCXIV.
 SUPERIORUM APPROBATIONE.

SERENISSIMO
LUDOVICO
INFANTI REGIO
HISPANIARUM
S. R. E.
CARDINALI DIACONO

ANGELUS MARIA QUIRINUS

S. R. E. CARDIN. BIBLIOTHECARIUS

FELICITATEM.



*Nter præclarissima inclytæ
FARNESIÆ propaginis deco-
ra illud certe recensendum,
quod ipsi acceptos refert
Sedes Apostolica, dum ma-
ximis cum universa Ecclesia procellis un-
dique jaçtaretur, primo sapientissimum.*
G

& nunquam satis laudatum Rectorem
PAULUM III. deinde binos amplissimos Car-
dinales, hujus Nepotes, Alexandrum, &
Raynutium, tenera quidem admodum æta-
te ad eum honorem evectos, at ea indole,
eo ingenio, iis studiis, ac moribus perorna-
tos, ut illico ad laudes, & gratulationes
ipsis deferendas gravissimi, integerrimique
eorundem Collegæ accurrere non dubitave-
rint. Hæc dum dixero, nemo est qui non
videat, SERENISSIME LUDOVICE, libellum
hunc meum non aliis quam Regiis Tuis
auspiciis evulgandum fuisse, quippe qui
genus alto a sanguine BORBONIDUM ducens,
utrumque præterea, & stirpis FARNESIÆ,
& Romanæ Purpuræ ornamentum con-
junctum tenes. Convenit insuper ætas Tua
præsens cum illa, qua præstantissimum
FARNESIORUM Cardinalium par ab AVO
SANCTISSIMO adhibitum fuisse comperitur
ad

ad graviora Romanæ Ecclesiæ negotia ;
siquidem octodecim tantum annos natus
Alexander, Apostolicæ Legationis mu-
nus in Hispania gessit ad Carolum V. Cæ-
sarem, post obitum ejus Conjugis Isabel-
læ, indeque Romam vix redux, iterum eo
ipso anno, paribus insignibus decoratus ad
eundem Carolum Cæsarem in Belgium,
& in Galliam ad Regem Franciscum
commeavit. At multo illustrior, quam
sanguinis, quam Purpuræ, quam ætatis
inter Te, & Pontificios illos Alumnos ex
iis virtutibus profecta congruentia, qui-
bus una, & constans omnium fama miri-
fice Te præditum esse testatur, quarumque
florescentem in ætate viridi imaginem in
Alexandro, ex Hispanica illa Legatione
redeunte, se coram Avenione suspexisse
professus est in literis ad eundem scriptis
Jacobus Sadoletus, Episcopus Carpen-

toractensis. Religio vero, quæ omnium
omnino illarum maxima judicanda est,
quanta Tibi insit, apertissimum præbet
documentum cura illa singularis, quam nu-
perrime suscepisti, ut Joannis Avilæ, Bæ-
ticæ Apostoli, in sacros fastos Sedis Apo-
stolicæ auctoritate nomen referatur. Quæ
ipsa cura novo quodam jure Opellam hanc
meam Tibi vindicat; prodromus siqui-
dem ista est Voluminis hoc ipso anno, Deo
juvante, in lucem a me proferendi. Istud
Reginaldi Poli S.R.E. Cardinalis, Regio
sanguine procreati, Epistolas complectitur;
harum autem plures ea referunt, quæ ipse
in Hispanica Aula peregit, Pontificii ad
Carolus Cæsarem Ablegati officio fun-
gens, paucis tantum mensibus antequam
FARNESIUS Cardinalis eandem adiret. Quo-
niam vero eo ipso tempore, in iisdem par-
tibus suum illud Avila ministerium obi-
bat,

bat, Polo minime ignotos fuisse oportet sanctos hujus labores, imo non abs re erit arbitrari, eundem horum exemplo magis magisque exstimulatum fuisse ad Dei causam, pro qua egregie jam desudabat, vel ipso vitæ suæ impendio tuendam.

Quoquo igitur me verto, omnia me invitant, ut Regiæ tuæ tutelæ meam hanc Lucubrationem committam, fretus ad ipsius præsidium nihil defuturum; siquidem quam spem, & expectationem tuæ præstantis, eximiaeque virtutis, tuæque futuræ summæ amplitudinis excitasti, eam præclare semper agendo, & virtuti, ac veræ dignitati serviendo, tue-ri, augere, confirmareque non desinas. Hisce propemodum verbis hortatus est olim Sadoletus, jam Cardinalis, Guidonem Ascanium Sfortiam, Nepotem & ipsum PAULI III. sacroque & ipsum Se-
natui

natui accensitum; at ego ea ipsa, ut fe-
ci, usurpans, impudentissimus forem, si
aliam mihi personam sumerem, quam
præclara quæque de Regia Tua Ampli-
tudine sperantis, ac pollicentis. Ut autem
de eadem grandiora in dies spe, atque ani-
mo cogitem, illud etiam facit, quod cer-
to confidam, illustria FARNESIÆ virtutis
exempla, hic oculis Tuis proposita, satis
idonea fore, quæ mentem Tuam ad eo-
rundem imitationem rapiant; unde exo-
rietur, præclare olim dictum a Carolo
Cæsare, postquam compertas habuisset
Cardinalis Alexandri FARNESII dotes,
Collegium Cardinalium si ex talibus
Viris constat, profecto Senatus simi-
lis nusquam gentium reperietur,
multo nunc verissime, eo Senatu Regiis
Tuis & natalibus, & moribus insignito,
posse prædicari.

EX suscepto in Reginaldi Poli Epistolarum parte prima evulganda consilio, alteri etiam, quæ in lucem quam primum exhibet, Prodromum adornare constituens, huic rei Opusculum istud de PAULI III. Gestis, intra primos quinque Ejus Pontificatus annos conclusis, quos nimirum unice ambæ illæ partes simul junctæ complectuntur, destinavi. Ut primo oculos tuos in ipsum conjeceris, benevole Lector, statim agnosces, nihil mihi antiquius in eodem elucubrando fuisse, quam ut, in propatulo posita tanti Pontificis incredibili bonitate atque sapientia, nemo foret, cui statim non constaret, perperam prorsus Heterodoxos, quo suam a Catholicorum cœtu secessionem tueantur, omnem lapidem movere, ut Pontificis, quo sedente altas illa radices egit, nomen ac facta atris coloribus exprimant. Pars quidem prima meo huic scopo pauca tantum suppeditavit, quod tota fere versata sit in describendis humaniorum literarum studiis, quæ Reginaldus Polus in Veneta ditioe excoluit; at pars altera enarrat binas Legationes ab eodem, jam Cardinali, pro gravissimis religionis negotiis obitas, scilicet Belgicam, & Hispaniensem, in quibus seu demandandis, seu moderandis PAULUS III. palam ostendit, sibi maxime cordi fuisse Christianæ Reip. bonum, atque isti procurando egregios ministros sibi delegisse, quotquot nempe ipse in amplissimum Cardinalium Collegium cooptavit, quorum proinde præclaris studiis non obistere & obstare, sed suppetias ferre opus erat sinceros boni illius amatores, cujuscemodi laudem ad Heterodoxos ea tempestate minime spectasse, vel ipsimet sua illa secessione demonstrarunt.

Unum tantum hic addam; optimi, sapientissimique Pontificis imaginem, quam hoc Opusculo delineavi, eam fuisse, qualem deposcebant tempora, in quæ incidit PAULI III. Pontificatus, nostra autem tempora nacta esse Pontificem, cujus egregiæ dotes, videlicet ingenii præstantia, mentis acies, dicendi, scribendique copia, naturæ bonitas, morum facilitas, in audiendis omnibus hominibus mansuetudo, in expediendis negotiis, præsertim ad Ecclesiasticæ disciplinæ redintegrationem spectantibus, celeritas, hæc, inquam, & aliæ præterea Eiusdem dotes efficiunt, ut potius quam nos præteritis sæculis invidemus, nobis invidere debeant futura, scilicet, quod earum memoriam nulla unquam oblitteratura sit ætas. Vale.

ELENCHUS CAPITUM HUIUS LIBELLI.

CAPUT I.

De PAULI III. in optimis literis, Græcis, Latinisque præstantia. pag. 1.

CAPUT II.

De PAULI III. studio in derivandis ex privato familiæ suæ commodo publicis utilitatibus. pag. 11.

CAPUT III.

De PAULI III. æquitate, & prudentia in Anglicani Schismatis per Henricum VIII. invec̃ti negotio. pag. 33.

CAPUT IV.

De PAULI III. curis pro Ecclesiæ reformatione, Concilii Oecumenici convocatione, concordia Principum Christianorum, horum fœdere adversus Turcas, deque itineribus ab eas ipsas causas, ætate admodum senectâ, ab eodem susceptis. pag. 53.

CAPUT V.

De PAULI III. industria in S. R. E. Cardinalium delectu, & in adhibendis inter ipsos ætate, ac virtute provectioribus ad Legationes ultra montes pro gravissimis Ecclesiæ negotiis. pag. 78.

CAPUT VI.

De PAULI III. benignitate in excipiendis S. R. E. Cardinalium seu precibus, seu consiliis. pag. 89.

APPENDIX ex Oratione Romuli Amasæi habita in funere PAULI III. pag. 102.

C A P U T I.

*De PAULI III. in optimis literis, Græcis, Latinisque
præstantia.*



EMO prorsus erit qui inficietur verissimum esse quod sæpe dictum est, & quotidie dicitur, *Talem quemque fieri hominem, quales sunt res, & qualia studia, quibus ille delectatur.* Itaque de PAULI III. Pont. O. M. Gestis acturus, primo loco de studiis dicam, oportet, quibus ille vacavit, ostendamque hujuscemodi fuisse, quibus decebat ejus mentem imbui, & informari, qui omnium hominum princeps dignitate futurus, ipsis quoque sapientia antecelleret. Honor quidem magnus ea pariter ætate in Romana Curia habebatur Jurisconsultorum disciplinæ; at longe major Theologicis rebus, quod multo aptiores istæ, quam illa, putarentur ad eam animi magnitudinem parandam, quæ idoneum hominem efficiat, ut se ipsum justitia, temperantiaque exornet, deinde ut ceteros consilio, & prudentia sua regat. Hæc ipsa habet, utriusque illius disciplinæ comparisonem instituens, præstantissimus Cardinalis Sadoletus in Epistola ad Cardinalem Raynutium Farnesium, affirmatque ibi, nihil

ab Juris scientia magnum, præclarumque existere, nisi cum liberalioribus studiis jungatur, sine quibus vix amplum quippiam, aut magnificum concipere quis possit: *Et sunt tamen* (ait ille) *ex numero Jurisconsultorum clari aliqui & præstantes viri, quales in Senatu nostro non paucos cernimus, aptos ad populos civitatesque regendas; verum illi bonitate ingenii, & naturæ præstantia, non Juris Civilis studio, tales effecti sunt, præsertim si ad legum scientiam, id quod plerique eorum fecerunt, optimarum quoque artium cognitionem addidere.* Ita in ea Epistola Sadoletus, ut Raynutium moneret, ne facile crederet, PAULUM Pontificem, ejus Avum, ipsi auctorem esse posse (quæ de re novus quidam hominum sermo percrebuerat) ut relictis eximiis illis artibus, & præclaris studiis, in quibus, consentiente omnium fama, noctes, & dies assidue versabatur, ad Jus Civile perdiscendum se dederet; at crederet potius, Pontificem ita loquutum fuisse (quoties certe de eo sermone constaret) non imperantis modo, sed veluti tentantis, ut eliceret sensum animi Nepotis sui. Addere Sadoletus potuisset, interpretationem hanc suam certam reddi ex studiis, quæ ipse Pontifex excoluerat, & quibus testimonium perhibet in alia Epistola ad eum Pontificem data, professus, se plurimi semper fecisse, ac facere *bonarum artium*
om-

omnium, literarumque egregiam scientiam, qua ille pollebat. Hæc plurimis aliis excellentissimis virtutibus adjuncta, effecit, ut Pontificatus honor, quo ipso die sacer Senatus intra septa se receperat, ei delatus fuerit, sine mora (verba sunt Sadoleti in ea Epistola PAULUM alloquentis) contradicente nemine, omnibus suffragiis, ut renuntiatio indicium fecerit dignitatis, ipsa vero celeritas renuntiandi aperte ostenderit, tantam, tamque eximiam virtutem, quanta in Te semper fuit, ad tantos motus rerum, quibus jactatur Respublica, sedandos, & ad salutarem portum consiliis sapientibus dirigendos, quam primum, & quam maxime necessariam esse. Videamus ergo quænam fuerint egregia ea studia, quæ PAULUS III. adamavit.

Principem inter ea locum obtinuisse Ecclesiasticorum Syntagmatum lectionem, sat aperte docemur ex cura, quam ille cepit, ut Græcum Codicem Demonstrationis Evangelicæ (cujus author Eusebius Cæsariensis) utendum, fruendumque acciperet ex Bibliotheca Principis Mirandulani. Rem ita narrat Donatus Veronensis in Epistola, qua Operis illius a se confectam in Latinum idioma versionem PAULO III. dicavit: *Porro id Opus Giber-tus, quum diu, multumque cogitasset, Latinum, potius, quam Græcum edi oportere decrevit, quod ex illius Latina editione multo plures, quam ex*

Græca, utilitatem capturos videbat; quanquam alia quoque de causa sperabat, eosdem libros Tibi non fore ingratos, quum memoria teneret, Te illorum Græcum exemplar, quod unum in Italia penes Joannem Franciscum Mirandulensem Principem extaret (virum cujus in omni genere literarum, omnibusque magnarum artium disciplinis, industria, atque excellentia nunquam satis prædicabitur) omni studio & habendum, & legendum curasse, idemque summopere laudare consuevisse. Et paulo post: Maximum laborum meorum fructum mihi percipisse videbor, si, quum huic Giberto, patrono meo, Tuæque Sanctitatis humillimo clienti, obtemperavero, ipsum Opus a me Latinum factum Tibi non displicuisse cognovero; quum enim Sanctitas Tua illud, propria Græcorum lingua exaratum, diligentissime olim legerit, quod ego id recte interpretatus sim, multo facilius judicare poterit. Græcarum literarum amor, qui PAULUM Pontificem impulit, ut ex Mirandulensi Bibliotheca habendum curaret Eusebii Codicem, is ipse effecit, ut satageret, domesticam suam Bibliothecam ejusce generis gazis abundare. Quare Aloysius Lippomanus, Episcopus Metonensis, & Coadjutor Veronensis, eidem nuncupans Catenam suam in Genesin, his verbis ipsum affatur: Plurimum Sanctitati Tuæ nos debere fatemur, quod vetustissimos Græcos

cos Codices, & nunquam typis excusos ex celeberrima illa Tua Bibliotheca nobis benigne subministrasti, ex qua non pauca, eaque recondita in hoc volumen ingessimus.

Præterea Philosophicarum rerum, quæ ad Astro-
rum scientiam præsertim spectarent, PAULUM Pon-
tificem cupidissimum fuisse, certos nos facit Hie-
ronymus Fracastorius, ei nuncupans lucubratio-
nem suam de Homocentricis, atque in ejus Proœ-
mio ita loquens: *Quum vero a Sanctissimorum
Tuorum pedum deosculatone ad nos reversus esset
Jo: Matthæus Gibertus, Episcopus, ego illi quasi
fructus nuntiaturus ejus otii, quod ipse peperisset
mibi, dixi, negotium de Stellis perfecisse me, ac
sub ejus auspicio, dedicationeque, si ita sibi vide-
retur, editurum. Qui quum mihi gratulatus
fuisset: Minime, inquit, sub nostro, sed sub mayo-
re auspicio edes. Meum enim si est hoc munus,
placet ut novo Pontifici novum dicetur Opus; quod
cæli, ac syderum contemplationem complectatur,
quorum ille claves, atque imperium gerit. Gratif-
simum enim illi futurum puto, regno suo audire
decus, dignitatemque suam esse restitutam; præ-
sertim quod is post Religionis, & Christianæ Reip.
curas nullo alio magis tenetur studio, quam totius
Philosophiæ, præcipue illius, quæ circa sydera,
& cælestes orbes versatur. Deinde addit: Quod si*
E

Et ea quoque te tenebit tum digna, tum necessaria cura, quæ Julium Cæsarem Pontificem Maximum habuit, reformandi anni, Et solaris cursus ad vera æquinoctia reducendi, succurrendique lapsis cyclis, hinc Te non invitabunt modo, sed Et apertissimam viam ostendent sydera, quibuscum magna quædam esse Tibi cognatio videtur. Insuper nec Poetarum, tam Latinorum, quam Græcorum cultum PAULO defuisse, testatur M. Antonius Flaminus in Præfatione, qua Explanationes suas in duos & triginta psalmos eidem Pontifici nuncupavit: *Quum superiore anno (inquit) explanationem meam in duodecimum librum Aristotelis de prima Philosophia ad Te missem, eum Tu librum Et tam cupide legisti, Et eo laudum genere ornasti, ut facile omnes intelligerent, meas literas, Et lucubrationes Tibi non injucundas esse. Huc accedit, quod, ut cæteris omnibus ingenuis artibus a puero semper studuisti, ita Poetas Græcos, Et Latinos maxima diligentia perlegisti, quippe qui non ignorares, hoc literarum genus non a summis Philosophis modo, sed a nostris etiam Theologis, Et illis quidem gravissimis, semper cultum, celebratumque fuisse.*

In universum Græcas, Latinasque literas PAULUM conjunxisse, fidem etiam facit præstantissimus ea ætate humanioris literaturæ in Bononiensi Acad-

demia Professor, Romulus Amaseus, quippe qui in Oratione, quam inscripsit de PAULI III. Pont. Max. erga literatos homines beneficentiæ spe, ejus Pontificis literaturam his verbis extollit: *Qui cum suo studio, tum doctorum perpetua adjutus consuetudine, tantum e Græcis, Latinisque dicendi, atque intelligendi fontibus hausit, ut ei cunctorum hominum consensus non magis ob generis claritatem, & cum fortunis conjunctam virtutem, quam optimarum artium cognitionem, inter Collegas suos principem locum tribuerit. Quem igitur unquam de honestis studiis, bonisque literis bene meriturum speremus, si hic non unus, plusquam cæteri simul omnes, quos paulo ante nominavi, de vestris commodis, atque ornamentis cogitarit? Si non magnam curarum suarum partem ad eas artes, quibus ab ineunte ætate ipse deditus fuit, decorandas, & honestandas transtulerit? Pariter ejus studia magni fecisse comperitur Petrus Bembus, qui in Epistola ad eundem Pontif. Familiar. lib. VI. affirmans, inter antiquorum Regum, & clarorum Imperatorum res pace gestas, pulcherriam humano generi, & naturæ propriam, maximeque salutarem sibi semper eam visam esse, qua illi suum studium ad bonas artes fovendas, atque illustrandas transtulerunt, mox subdit: *Quo ex fonte quantæ, quamque illustres in hominum con-*
ven-*

ventus utilitates, & jucunditates permanarint, nemo Te melius intelligit, cujus præstans, & excellens in Latinorum, & Græcorum literis eruditio, omnes qui huic se rei dediderunt, in eam spem adduxit, ut per Te celeriter magnum incrementum sumptura bona studia existiment; imo vero non dubitavit pronunciare, eundem ita omnibus polioribus literis, & doctrinis fuisse perornatum, ut in iis multo doctior, quam Leo X. habitus fuerit. Ita ille PAULO III. nuncupans Epistolas a se nomine Leonis X. conscriptas; idemque quatenus sibi fas esse putaverit Leoni PAULUM antepondere, testatum reliquit in Epistola ad Franciscum Molsam. Tandem Ludovicus Sensus (cujus testimoniis in Diatriba sæpius usus sum, quod Scriptor ille, etiam synchronus, nec Ciacconio, nec Raynaldo, nec aliis, quotquot de PAULI III. Gestis differuerunt, innotuisse videatur) in postrema ex quinque Concionibus, quas, id muneris sibi Ascanio Parisiano Cardinali Legato demandante, ad Perusinos Cives habuit, de multijuga PAULI literatura ita scribit: *Quem igitur majore prudentia, quam Divus PAULUS III. fuisse, aut potuisse esse unquam dicemus? Qui cælesti, ac divina quadam mente, & intellectu, natura præditus, prima pueritia ad optimarum literarum studia deductus, summa cum laude, & prope stupore omnium in illis semper versatus est; quem post exacte com-*
pa-

paratam Romanæ, & Græcæ linguæ scientiam, post emensum liberalium artium orbem, post lustratas omnes omnium ætatum Historias, ex naturalium rerum cognitione ad sacrorum doctrinam gradum fecisse, & denique divinarum, humanarumque scientiarum, & omnium pulcherrimarum artium prodiiſſe dicunt eruditissimum.

Quam insignis autem fuerit ejus Pontificis in literas, literatosque munificentia, eum ipsum Scriptorem testantem audiamus: *Huic ipse* (loquitur de Francisco, juvene Perusino, cui cognomen Platonis ex virtute ipsa accesserat) *alioqui sibi incognito, commendatione Gasparis Contareni Card. ne præstans ingenium rei domesticæ angustia opprimeretur, olim singulis annis HS M. CC. hoc vero anno M. M. M. D. C. pendi constituit. Additque: Testes sunt omnes filii vestri, Cives, omnes Urbis hujus adolescentes, qui se se ad studia literarum applicuerunt, applicabuntque usque per omne ævum. Quibus, ut majore alacritate navarent operam, quotannis HS amplius M. M. M. M. D. CCC. inter eos, simul ac doctores evaserint, distribuendos indulſit. Testes denique omnes juris consulti, & omnes medici, quorum annua stipendia in omnes ætates futuras, HS quatuor millibus aucta voluit. Cujusmodi dona, Cives, ante hunc, nullius Pontificis in hoc literatorum*

gymnasium meministis. Quemcumque vero perfectum, & absolutum doctrina, ac sapientia esse intelligit, ex omnibus terrarum oris ad se se accersit, in familiaritatem suam admittit, censibus explet, & honoribus aliis quidem alios, sed spe majoribus omnes ornat; nonnullos vero supremis illis, quibus vix majus aliquid animo, ac desiderio capere mortales homines possunt.

Facebant nunc quotquot de PAULI III. studiis loquentes, ipsum Astrologiæ, quam Judiciariam vocant, unice deditum fuisse calumniantur. Eam labem a sapientissimo illo Pontifice pro virili amoliri conatus sum in Diatriba mea altera §. I. præsertim adversus Cl. Schelhornium, qui Amœnit. Histor. Eccles. & Liter. T. II. p. 464. vulgatum a Cardano de PAULO III. thema Genethliacum pro germano nobis obtrudens, fidem, quam criminatur ab eo Pontifice figmentis illis præstitam fuisse, eam iisdem se præstare imprudens demonstrat; imprudens, inquam, nam idem eodem Tom. p. 609. diserte temeritatis damnat quotquot eorum thematum ineptias venditant, non Melanchtoni suo, non aliis ex hujus grege parcens; quibus tamen non erat cur obstreperet, siquidem thema illud, cui eventa ferme adamussim respondisse comperiuntur, ante ipsa, non postea conflatum fuisse, volens & libens admittat.

CA-

CAPUT II.

*De PAULI III. studio in derivandis ex privato familiæ
sue commodo publicis utilitatibus.*

Nihil notius, quam procurata a PAULO familiæ
sue commoda, & ornamenta obtrectatorum
sermonibus locum & modo præbere, & olim præ-
buisse, eosque acriter contendere, nimium in eandem
studium vel ipsa ejus Principatus primordia com-
maculasse, quippe qui vix elapsis ab eo inito duobus
mensibus ad amplissimum Cardinalatus Ordinem bi-
nos Nepotes evexit, licet admodum adolescentes, ni-
mirum Alexandrum Farnesium, & Guidonem Af-
canium Sfortiam, quibus, post decem circiter annos,
tertium, viridi etiam ætate, Nepotem suum adjun-
xit, scilicet Raynutium Farnesium. Nil igitur
mirum, si PAULI nomen ea de causa in invidiam
vocare non est veritus Paulus Sarpus in Histor.
Conc. Trid. at victas huic quodammodo manus de-
disse Card. Pallavicinum, id certe haud mediocrem
admirationem promeretur. Hæc ipsius sunt ver-
ba Hist. Conc. Trid. lib. III. cap. XVII. *Non per-
che PAOLO III. si lasciò trarre ad un eccesso di tene-
rezza verso il suo sangue, togliesi che non fosse nel
resto zelator della Religione, secondo che appare
da tutto il corso del suo Pontificato. Si come da un*

atto virtuoso non ben s'inferiscono tutte le virtù, così da un atto diffettoso non ben s'escludono tutte. E quel difetto di PAOLO è cotanto umano, che non si noteria per difetto in verun altro Principato, che non habbia del soprumano. Hujusmodi tamen vindicias, etsi tenues, & leves ad inustam Pontifici labem amoliendam, immodicas reputans Petrus Franciscus Curayerus, recens Sarpii Historiæ, quam in Gallicum idioma convertit, interpretes, & vindex, in Pallavicinum insurgit aspere prorsus, in hunc modum: Ce fut le 18. Décembre 1534. deux mois après son election, qu'il fit cette promotion, que le Cardinal Pallavicin tâche d'excuser comme il peut, c'est à dire assez mal, en disant qu'un tel excès de tendresse ne seroit pas un défaut dans d'autres que dans un Pape. Mais en qui ne condamneroit-on point le choix de deux enfans pour occuper une dignité, dont la fonction ne consiste à rien moins qu'à partager avec le Pape le gouvernement de l'Eglise Universelle, & à lui donner des conseils dans les affaires du monde les plus importantes? Ne seroit ce point un défaut dans d'autres que dans un Pape, de faire un tel choix; & quelle est la Morale du Cardinal, s'il l'acru? Il faut avouer qu'il a un Evangile tout particulier pour les Papes, & qu'il est aussi difficile de l'excuser d'un excès de flatterie, que Fra-Paolo quel-

quelque fois d'un peu trop de malignité.

Quam autem ego rationem ad PAULUM purgandum in hoc Capite sim initurus, ejus lemma aperte demonstrat. Antequam vero eandem explicare, & confirmare aggrediar, ad obrestatores illos conversus, ab ipsis quæro, quænam fuerit causa, cur spes omnes, quas de bene gerendo a PAULO Pontificatu conceptas, ex eo honore in Nepotes collato occidisse produnt, eæ ipsæ, vel illorum judicio, paulo post revixisse non censeantur, dum idem Pontifex post quatuor tantum menses, septem præstantissimos Cardinales adlegisse dignoscitur, Scombergium, Simonetam, Ghinuccium, Bellajum, Fischerum, Contarenum, Caracciolum? Cur præterea easdem firmiori adhuc documento post biennium constabilitas fuisse iidem non sint facti, quod eo tempore idem Pontifex eandem dignitatem impertitus fuerit Viris aliis, qui pariter ad Remp. optime administrandam omnium certe excellentissimarum virtutum copia abundabant? Eos uno elogio complexus est in Epistola ad Card. Sadoletum celeberrimus eæ ætate humaniorum literarum in Patavino Gymnasio Præceptor, Lazarus Bonamicus: *Sapientissimi (inquit) innocentissimi, clarissimi, & summa auctoritate præditi Viri, evocati, rogati, facti sunt Cardinales! O præclara Comitia! o his difficilissimis temporibus necessaria! o PAULI III. sapientiam,*

tiam, & bonitatem singularem! At de præclarissima PAULI Pontificis laude in Cardinalium delectu fufius agemus in V. hujus lucubrationis Capite.

Venio igitur ad tres PAULI Nepotes, de quibus supra. Hi omnes, dum ille Pontificatum conscendit, studiorum causa Bononiæ degebant, & quam naviter in ea incumberent, testem habemus præstantissimum in ea Urbe Rhetorem, Romulum Amaseum, quippe qui egregiam eorundem adolescentum indolem, Orationi a se habitæ de PAULI III. Pont. Max. erga literatos homines beneficentiæ spe, veluti fundamentum constituit; nam ejus initio ita loquitur: *Ante oculos vero nobis sint veræ, ac viventes imagines ipsius Pont. Max. Nepotes adolescentuli tres, non fortunæ tantum, ac generis claritate, sed multo magis ingenio, ac liberalissima institutione æqualium suorum præstantissimi, ac multo natu majoribus pares, unde auspiciatius ad munus meum aggredi possim, quam si ab ea spe exorsus fuero, quam faustissimi hujus Pontificatus primordia nobis ostentant.* Eandem vero concludens, & de commodis, ornamentisque, quæ ex PAULI Pontificatu Bononientis Academia sperare posset, verba faciens, hæc tandem subdit: *Cujus certe rei eventum non ipsius modo Principis divina virtus, sed trium etiam horum adolescentum ejus Nepotum ingenia, & mores vobis præstare*
vi-

videntur. Nam cum hi in hac studiorum celebritate liberalissime educantur, & ab optimis, atque eruditissimis præceptoribus instituuntur, dubitare certe non possumus, civitatem hanc altricem suam, æque caram, ac patriam ipsam habituros, ad vestrum vero ordinem commendandum, juvandum, ornandum, fraterni in vos amoris omni tempore documenta duros. Estis vos quidem (ut vobiscum jam loquar) Pontificii adolescentes, in amplissimis nati fortunis, ad multo vero ampliores Dei, Divorumque ope, ac vestri Avi virtute, & meritis educti. Sed si is sum, cui credendum aliquid putetis, hoc mihi credite, non Purpuram vos, aut Infulas, non quævis maximorum honorum, ac dignitatum insignia, illustriores, ac magis conspicuos reddere posse, quam secundum eas, quas nunc sedulo colitis disciplinas, ea studia, atque officia, quæ & in universum istum ordinem, & in ejus lectissimum, atque honestissimum quemque, ac vestri quam simillimum contuleritis. Adolescentum illorum indoles ista, ea studia, ingenium, mores, & natura, quoties ostendam quam valde idonea fuerint, quæ gravissimos, integerrimosque ejus avi Cardinales adducerent, ut illico ob præsentem, speratamque eorundem amplitudinem ad laudes, & gratulationes accurrerent, inde profecto constabit, morosos præter æquum adversus PAULUM III. se præbere quotquot
in

in Nepotibus illis suis ad honores evehendis ejus animi imbecillitatem, Romano præsertim Pontifici nullo pacto condonandam, criminantur. Viro-
rum illorum, quibus nihil magis cordi erat, quam Catholicæ Ecclesiæ bonum, de eo PAULI factò judicia tutissimam utique mihi semitam sternent ad iniquas aliorum reprehensiones rejiciendas.

Quotquot extant seu Poli, seu Contareni, seu Sadoleti, seu Bembi literæ, quas ipsi conscripserint ad eorundem Adolescentum opem in gravissimis Ecclesiæ negotiis confugientes, ut sua gratia, & auctoritate ab Avo suo, optimo, & sapientissimo Principe, iis bene gerendis opportuna subsidia impetrarent, tot adsunt istorum fidei, æquitatis, integritatis, constantiæ, humanitatis, uno verbo, rarissimæ virtutis certissima argumenta. At quoniam Adversarii non initam ab iisdem post acceptum Purpuræ honorem vitæ rationem, sed eum honorem præcocius ipsis delatum reprehendunt, huc afferam, quæ probent PAULI erga ipsos munificentiam non tantum a noxa vacasse, sed magnam præterea eundem laudem promeritum fuisse, quod perspicacissimum acumen exeruerit in amplissimis ornamentis, nulla habita viridis ætatis ratione, conferendis, quibus præpotens Deus, etiam supra ætatem, virtutes, gravitatem præsertim, & prudentiam tribuisset. Virtutum autem istarum, quibus PAULI Ne-
po-

potum adolescentia exornabatur , atque sapientiæ , qua Avus adductus , dignos eosdem habuit , quorum honoribus moram ætas non objiceret , unum Sadoletum sat erit testem a me laudari , quod ejus dicta ad fidem rei , de qua agitur , faciendam luculentissima sint ; quodque Polus , Contarenius , & Bembus , ut in reliquis plerisque omnibus rebus ad Remp. spectantibus , ita in hoc etiam negotio , unum , idemque cum Sadoleta sensisse facile quivis conjiciat , idque insuper , ut jam dixi , ex horum literis plane intelligitur , ex quibus pariter constat , eos longissime abfuisse , ne fortunam , & gratiam , potius quam judicium , suis in officiis sequerentur .

Principem hic locum teneat Alexander Farne-
sius , quod omnium primus inter tres illos Nepotes ,
imo inter alios omnes PAULI III. Cardinales , ejus-
dem munificentiam expertus fuerit . Jacobus Sado-
letus , Episcopus Carpentoractensis , nondum Car-
dinalis , per annum circiter distulit gratulationis
officium Alexandro exhibere , & moræ hujus suæ
causam reddens , Epistolam ad ipsum datam , his
verbis exorditur : *Quo tempore primum de tuo ho-
nore amplissimaque dignitate nuntius ex Urbe ad
nos buc pervenit , etsi statim cogitans existimare
cœpi , te , quanquam ætate adhuc esses adolescens ,
indole tamen virtutis , & commendatione ingenii
dignum habitum esse , cui tantus bonos jure com-*

C

mit-

mitteretur; tamen quominus festinare dare ad te literas, tuæque & præsentis, & speratæ amplitudini gratulari, illa res effecit, quod neque naturæ meæ, nec instituti unquam fuit, ita accurrere ad laudem, & ad gratulationem, ut fortunam magis, quam iudicium secutus viderer. Subdit, se quidem probe novisse, quo ille ex genere ortus, & in qua familia educatus foret, & quo etiam pacto splendor, nobilitasque Majorum suorum in suis moribus, & in sua indole, ac natura lucerent, idque, quod optimus, & maximus Pontifex, eo Principatu, vel antequam ipsum adipisceretur, dignissimus, erga omnes suos optimis & studiis, & moribus imbuedos semper maxima cura usus fuisset, ut in eos viros evaderent, quos Christiana Resp. speraret; hæc, inquam, se probe novisse, at non ideo properandum sibi ad gratulationem putasse, sed expectare voluisse, quoad certius aliquid de ipso Alexandro ad se perferretur: Postquam vero (inquit) plurimorum literis, ac nuntiis, unaque & constanti voce omnium, de tuo ingenio, tuaque modestia, deque optimis & liberalissimis moribus, illaque imprimis admirabili comitate, veræ nobilitatis socia, qua tu probos & doctos præcipue complecteris, fama ingens increbuit: egoque Avenione tuas quasdam legi literas diligenter scriptas, quibus cura & sollicitudo animi tui indicabatur, ut in Ecclesia,
quæ

quæ ad Deum, & ad cultum religionis pertinent, rite atque integre administrarentur omnia (quam ego virtutem omnium maximam esse judico) tunc demum existimavi maturum esse scribere aliquid ad te, & tibi de tuis amplissimis ornamentis gratulari, cum jam non ad incertam amplius spem, sed ad firmam & fundatam de te opinionem, mea & lætitia & gratulatio dirigeretur. Firmam, & fundatam Sadoleti de Alexandro opinionem illam, firmiore adhuc fundamento plura illico rerum even- ta constabilierunt, quorum unum quæ scripta ab illo ad hunc extat Epistola nos docet, nam ibi insignis hujus, atque egregia in Bembo ad Cardinalatum evehendo opera, auctoritasque collaudantur, & inde occasio capitur novas laudes tribuendi liberalitati, nobilitati, virtutique ipsius Alexandri, cujus, ait ille, præcellens dignitas in posterum tantis initiis, & veluti fundamentis in immensum quasi cresceret. Data est ea Epistola an. 1539. Calendis Maii, ac proinde antequam Alexander vicesimum annum attigisset. Alia autem pridie Non. Jul. an. 1540. majoribus adhuc encomiis eundem Alexandrum exornat, primo quidem quod in suscepta ad Cæsarem Legatione, multa ex sententia & sua, & Avi sui, Principis sapientissimi, cum Cæsare confecisset, deinde vero quod commendatio rerum, causarumque provinciæ Avenionensis, quam ab Ur-

be discedens apud animum Pontificis reliquerat, usque eo provinciæ illi profuisset, *ut simus* (inquit) *omnia, quæ voluimus, quæ ad horum fidelium populorum fortunas, ac salutem potius, adversus Judæorum improbitatem, ac fraudes tuendam pertinebant, ipsius (Pontificis) non solum æquitate, & justitia, sed summa etiam clementia, & benignitate consecuti.*

Eam ipsam causam adversus Judæos, æque ac Alexandro, Sadoletus commendaverat Cardin. Ascanio Sfortiæ, quodque istius pariter patrocinium in eadem apud Pontificem, æque ac Alexandri, magno emolumento provinciæ suæ fuisse comperisset, in tribus literis de eo argumento ad illum conscriptis rem illam in optimum locum ejus beneficio adductam gratulatur, ac propterea ipsius singularem constantiam, eximiamque animi virtutem meritis laudibus effert, inter cætera hæc habens in Epistola, quæ trium illarum postrema est: *Quid vel in bona ratione firmitus ea mente & voluntate dici, aut cogitari potest, quæ honestate sibi dignitateque proposita nullis hominum artibus & machinis a recto sensu se dimoveri passa est? vel ea iracundia & permotione animi generosius, qua tu jure optimo incensus, eorum interpretationes & additamenta, qui diplomatis sententiam ad commodum Judæorum detorqueri volebant, calamo sumpto obliterasti.*

om-

omniaque ad splendidam & veram rationem redigi voluisti: cum tu homo adhuc adolescens, fortunæ quidem muneribus insigniter ornatus, sed naturæ bonitate ingenioque ornatior, senum morbos & vitia, tua prudentia corrigeres, nec virtutis tuæ lumen aliorum tenebris commaculari sineres. Postea verba facit de machinationibus, quas Judæos adhibitueros fore satis perciperet, ut quæ bene acta, & constituta fuerant labefactarentur, non solum obliquis viis, sed interdum etiam recta, & palam; at quam parum sibi de machinationum illarum. successu verendum esset, Sfortia defensore rectissimi juris, pluribus explicat, ac tandem concludit: Jamdudum enim est, optime Sfortia, cum de indole tua & spe præstantissimæ virtutis præclarum judicium feci: porro ea mihi de te quotidie magis duplicatur opinio. Non enim jam initia in te virtutis, sed virtutem ipsam intueor, & quidem expressam atque perfectam omnium bonarum artium & partium lineamentis, quæ verum tibi honorem & veram dignitatem semper allatura est. Nam opes hæ, & divitiæ quæ extra nos sunt, si animus intus a bonis artibus vacuus sit, nihil omnino ad nos pertinent. Una, & sola est virtutis integritatisque possessio, quæ nos faciat beatos. Quam te jam adeptum esse, in ejusdem possessione consistere, & gratulor tibi, & pro tantis erga

po-

populos meos meritis debitas gratias ago.

Tertius PAULI III. Nepos ab Avo sacra Purpura donatus, Raynutius Farnesius. Ad eum binæ extant Sadoleti literæ, & ambæ fidem faciunt, hunc, æque miras in illo virtutes, ac in Alexandro fratre, & in horum amitino Ascanio, suspexisse. Fassus siquidem, percelebratum esse, eundem ea ætate, quæ nec dum matura ad cognoscendam, percipiendamque vim scientiæ, & virtutis esse solet, tantos tamen fecisse in iisdem progressus, *ut nihil eruditius, nihil a quoquam viro ingeniosius, ne in moribus quidem, totiusque vitæ modestia compositius, possit expectari*, deinde affirmat, virtutem, & nobilitatem generis sui totam plane expressam in ipso comparere: *Atque in ista (inquit) tua admirabili progressionem ad virtutem, in qua longe ætatem tuam ipsa industria superat, agnosco quidem vim generis, virtutem sanguinis, fortunam familiæ tuæ, quæ semper istiusmodi viris, atque ingeniis fuit referta. Etenim quis hominum unquam tuo Avo sapientior, quem ad summum in orbe terrarum sanctissimi honoris principatum ipsa sapientia provexit? Quis fratre tuo Alexandro probior, liberalior, moderatior; qui cum & fortuna, & dignitate, summis antecellat, humanitate tamen omnibus vult esse par? Non commemorabo ceteros: sunt enim omnes ex eadem stirpe & sanguine procreati.*

Hæc

Hæc leguntur in prima ex illis Epistolis. In altera vero de Raynutii optimis studiis, in quibus, consentiente omnium fama, noctes & dies assidue verfabatur, ea habentur, quæ in medium attuli in ipso Cap. I. exordio. Neque negotium nobis facefere debet collata in eundem ab Avo ante Cardinalatum, Archiepiscopatus etiam Neapolitani dignitas; nam ea auctus, quot & quanta statim ostenderit ingenii, & animi ornamenta, fidem facit Joannes Casa, Pontificius apud Venetos Ablegatus, in quibusdam literis ad Carolum Gualteruccium, Venetæ ipsius Casæ Oper. Edition. Tom. III. recitatis, quarum unæ his verbis eundem deprædicant: *Ho conosciuto S. S. Rma per scientia oltra alle ottime relationi, che sendo stato qui otto giorni mi son certificato delle mirabili qualità di S. S. Rma, & vi prometto che N. Sig. si può ben chiamar felice, aggiungendo questo Illustriss. si può dir fanciullo agli altri Nipoti di S. B. Et a me piace ancora più che non faceva Monsig. Cosimo Vescovo di Fano. Cosimum Gherium intelligit, laudatissimum Fani Antistitem, de cujus virtutibus, dum viridi & ipse ætate Infulas illas & adeptus fuisset, & gereret, pluribus locis utriusque Diatribæ dixi.*

Quæcunque hucusque ex Sadoleti Cardinalis literis, quem nemo in dubium revocaverit spectata integritate fulsisse, de liberalissimis PAULI III. Nepo-
tum

tum studiis, ac moribus in medium sunt adducta, ita aperte demonstrant, eosdem ad amplissimam dignitatem non temere, sed ex maxima Avi sapientia adlectos fuisse, ut nihil amplius ad eam rem comprobendam desiderari posse videatur. Quare, ut superius dixi, supervacaneum puto aliorum de ea re dicta recitare. Unum tamen afferre placet ex Poli ad Contarenum Epistola. Aberat hic Roma, Bononiensem Legationem administrans, dum Gregorius Cortesius, Monachus Benedictinus, & Thomas Badia, ex Ordine Prædicatorum, renunciati fuerunt Cardinales anno 1542. Itaque ei per literas electionem illam Polus significavit, ea plenus lætitia, qua pariter perfusum iri Contarenum pro comperto habebat. At dum ex illa ipsa quodammodo triumphasse Cardinalem Alexandrum Farnesium ille in iis literis testatur, nihil clarius, nihil luculentius afferri posse censeo ad ostendendum, eundem præclaro prorsus studio ad verum Romanæ Ecclesiæ decus cum antiquioribus, & sapientioribus Cardinalibus conspirasse, ut solo annorum numero ab istis discrepans, eos in studio illo plene, & cumulate referret. En Poli Epistolæ verba: *Non voglio lasciare di dirli, che il Rmo Fernese mi ha detto, che quando V. S. Rma havebbe avuto da eleggere dui Cardinali era certo che non haveria eletto altri che questi, anzi si può dire, che il Sig.*
Id-

Iddio l'habbia in ogni modo usata per primo, & principal istrumento in questa sancta electione per quello che V. S. Rma ha altre volte ricordato fedelmente a S. Sant. ragionando dell' uno e dell' altro. Viceſimum & alterum annum nondum exceſſerat Cardinalis Alexander, dum Comitia illa habita fuerunt, Polus vero ad quadrageſimum ſecundum, Contarenuſ ad quinquageſimum octavum deven- rant; & tamen pares cum utroque iſto erga Roma- nam Eccleſiam amoris, & pietatis ſenſus ille ſe gere- re, non alia proſecto ratione magis declarare potuit, quam electioni illi ita plaudendo, ac eos plaudere comperiebat, quibus, ut Poetæ phraſin uſurpem, *incoctum generoſo pectus honeſto*. Viros, cuiuſmodi Cortefius, & Badia, in ſchola Clauſtrali, ac pro- inde in virtutum gymnaſio exercitatos, potius quam vulgares, quam ambitioſos, quam ex ſæculi fluctibus irruentes, ſacro Senatui accenſeri impri- mis ſtudiſſe Polum, & Contarenum, alioſque conſummata ſapientia Cardinales, nil mirum fuiſſe dixerim; at eam ipſam ſapientiam in Alexandri juventa æque eluxiſſe, hoc certe meridiana luce clarius oſtendit, virtutis, quæ longe ætatem ſupe- rabat, PAULUM III. rationem jure optimo habuiſſe, dum Nepotes ſuos ad Cardinalatus faſtigium, etſi nondum eorum vultus lanugine vernarent, evexit. Addam, in evehendo pariter ad eam dignitatem

Petro Bembo, eximiam Alexandri prudentiam, atque constantiam insigniter patuisse. Id probant binæ illius Epistolæ Familiar. lib. VI. In prima gratias Alexandro agit, *Quod me (inquit) auctoritatis, patrociniique tui magnopere indigentem fovendum, & tuendum suscepisti, neque notum tibi hominem, neque ullo in te offitio antea fundum, ut ista tui erga me animi propensio, atque alacritas mihi præsto divinitus fuisse videatur.* In altera vero idem gratiarum officium persolvit his verbis: *Quanti me faceres ostendisti, qui maximorum & clarissimorum hominum auctoritatem me apud te impugnantium neglexisti, prudentiaque tua eorum consilium repressisti.* Datæ fuerunt ambæ literæ istæ an. 1535. mense Augusto, ac proinde nondum elapso anno post delatam Alexandro Cardinalatus dignitatem; ex quo constat, eundem vix inito honore illo de præstantissimis Viris bene merendi occasionem illico cepisse, & in eam rem toto animo incubuisse. Ex præstito igitur Bembi, Cortesii, & Badiæ, aliorumque hujuscemodi Cardinalium electionibus apud Avum adjumento, Alexandri virtus, animi magnitudo, sapientia id profecto consequuta est, quod PAULUM III. consequuturum Sadoletus ad eum scribens, & eundem Bembum ipsi commendans, affirmavit, ut nimirum ab omnibus, qui in toto orbe terrarum con-

jectos

jectos oculos in Romanam Aulam haberent, summis laudibus ejus nomen in cœlum ferretur, & maxima ipsi, & perennis gratia haberetur.

Atque hæc satis esse reor non ad liberandum tantum **PAULUM III.** ab infamiæ nota, quam suis Pontificatus primordiis inuisse passim vulgatur delata tribus iis adolescentibus Nepotibus Romanæ Purpuræ amplitudine, sed ad commendandam præterea ejusdem admirabilem solertiam in derivandis ex privato illo familiæ suæ ornamento publicis utilitatibus. Satis, inquam, esse reor, nam præfinitus huic Opusculo ambitus, temporis scilicet illius, quod Epistolæ, in primo, & altero Collectionis meæ Volumine comprehensæ, complectuntur, minime admittit, ut de tradito a **PAULO III.** familiæ suæ in quasdam Pontificiæ ditionis Urbes imperio differamus; de quo propterea argumento alibi erit tractandi locus, nimirum in tertio, seu in quarto Volumine. Huc quidem faceret regiarum nuptiarum splendor, quo pariter **PAULI III.** familiam honestatam fuisse novimus post Niciensem Congressum; at quoniam de isto agendum erit in Cap. IV. in eum locum reservamus argumenti illius tractationem. In antecessum tamen placet afferre Sadoleti Epistolam, qua docemur, **PAULUM III.** quum nihil reliqui faceret, quod ad Christiani generis tutelam, regimen, & procurationem pertineret,

exiguum quid dumtaxat naturæ, & amoris erga suos dedisse. Obierat Constantia, ejus filia, foeminarum utique lectissima, quam quum plurimi faceret Sadoletus, dolorem, quem inde accepit, non quidem coram, Sanctitati Suae, quam intellexerat nolle tristic illius eventus causa suum silentium, & cogitationes suas interpellari, sed per literas aperuit, in quibus hæc inter cætera leguntur: *Cum amissa tali filia, qualem tot & tam eximiis ornamentis præditam, virtutis, ingenii, humanitatis, prudentiæ, nostra non alteram extulisset ætas, nos hesterno die Sanctitatem Tuam maximo dolore affectam, & prope afflictam esse arbitramur, essetque ei tunc divina res facienda, nihil ipsa tanto vulnere retardata, in conspectum omnibus sese dedit, obivitque ea, quæ ad religionem, & summum Deum pertinebant, neque eorum colloquia, qui ab ea aliquid petebant, devitavit. Talem denique se omnibus in rebus præstitit, voce, vultu, sermonis animique firmitate, ut miraremur cuncti, mutuoque inter nos quæreremus, quoniam telum illud abiisset, quod tam valide immissum in Tuum pectus a fortuna videbatur. Vulgares igitur, & quotidianæ animi imbecillitates nullo pacto ex Sadoleti fide inerant in PAULO III. in quo contra gravitas, & temperantia, & rerum omnium moderatio sedem, ac domicilium constituerant.*

Ad-

Addens autem ibidem Sadoletus, ad doloris solatium, ad animi firmamentum Pontifici esse debere monumenta divinæ erga ipsum indulgentiæ, & bonitatis, quæ in eadem fœmina apparuerant, quippe quæ & gratiam, qua plurimum valebat, & ingenium, quo admirabili erat prædita, & opes, quibus egregie florebat, ad subsidium impotentium, ad tutelam viduarum, pupillorum, ad gratificationem omnium, qui ad ejus opem, auxiliumque confugissent, semper convertere in more habuisset; hæc, inquam, addens, non omittit ejus fœminæ sobolem, cujus videlicet excellens, atque eximia virtus efficeret, ut digna tali matre, tanto Avo jucunda, omnibus denique grata, & venerabilis haberetur. Præclarissimum ejus sobolis germen Guido Ascanius Sfortia, de quo supra. Cui indulgentiæ, & bonitati divinæ PAULUM III. respondisse, ejusdem sobolis præstantes ingenii, & morum dotes ad Reip. utilitates adhibendo, hoc certe (ut pluries dixi) non obtrectiones, sed præconia promeretur.

Quoniam vero obtrectiones illas graviore tumultu in PAULI III. nomen jaculari in more habent Heterodoxi, juvabit, pro Capitis præsentis coronide, ipsis opponere unum M. Antonium Flaminium, in quo, quum ii, præter præstans ingenium, & exquisitam doctrinæ copiam, suspiciant sanctam vitæ rationem, & singularem in Deum pietatem, ne-

mo

mo erit certe ex iisdem, qui illius sensus de aucta festinatis iis honoribus PAULI III. familia suo quoque suffragio probare refugiat. *In ipsa igitur Italia* (ita de eo loquitur Jo: Georgius Schelhornius, agens Amæn. Histor. Eccles. & Liter. Tom. II. de Religione Flaminii) *veritati Evangelicæ inimica, & in medio pravi perversique generis hominum, micabat tanquam splendidum luminare, plenusque divinæ lucis radiis, ita sensit, ita vixit, ut non dubitemus virum optimum purioris religionis, veræque pietatis studiosis adscribere.* Quid iste igitur de Cardinalis Alexandri Farnesii virtutibus senserit, & quibus plausibus summam rerum, quam ei vix ad dignitatem illam evecto Sanctissimus Avus commiserat, gratulatus fuerit, videamus. Extant plura carmina Alexandro a Flaminio inscripta, atque omnia ipsius laudibus scatent. Hæ propterea cum purioris religionis, veræque pietatis sensibus optime consentire, Heterodoxis iudiciis, censendæ erunt. Paucos tantum versus ex ea copia excerpam, quibus nimirum virili pueri, Carolum Cæs. adeuntis, animo, & fructibus, qui ex maturis ejusdem annis expectabantur, ita plauditur.

*Macte puer virtute, puer dignissime cælo,
Cæsaris ad magni colloquium propera;
Ut tua miretur jam dicta, animumque virilem
Romani custos maximus imperii.*

Et

*Et te jam primis venerari discat in annis
 Paullatim, donec fulserit illa dies,
 Cum genibus minor ipse tuis, spectante senatu,
 Procumbet sanctis oscula dans pedibus.
 Nam simul aucta suum ver dulce peregerit ætas,
 Et te maturum fecerit illa virum,
 Auspicio divum regno præfectus avito
 Aurea Romanis tempora restitues &c.*

Video utique qua ratione iidem Heterodoxi ictum in ipsos illatum repellere se posse arbitrari valeant, affirmantes scilicet, flavum Apollinem, blandasque musas, potius quam religionem, quam pietatem, ad eos versus fundendos Flaminium impulisse. Quare ne huic effugio sit locus, statim orationem converto ad psalmorum Explanationem, quam eodem Alexandro iste nuncupavit, & in qua, teste eodem Schelhornio, ubivis elucet eximia in Deum pietas, ardensque Numini optimo serviendi, placendique studium, & animus divino spiritu plenus. Nuncupatoriam illam Epistolam tanti fecisse reperio hominem illum, ut fere integram suæ illi de Flaminii religione lucubrationi inferuerit. Itaque quo sanctior habetur & Explanatio illa, & Epistola eidem præfixa, eo etiam ad religionis canonem castigatius de Mæcenate, quem eidem adscivit, loquutus fuisse existimari debet Flaminus. At in ea Epistola divinam illius indolem collaudat, ipsum publicæ utilitatis

tatis amantissimum dicit, & ejus præsertim, quæ non mediocre commodum divinarum literarum amatoribus allatura foret. Quid igitur clarius, quam Flaminium valde ab eorum sententia abfuisse, qui magno piaculo PAULUM Pontificem se obstrinxisse clamitant, quod teneræ Nepotum juventuti Romanæ Purpuræ honorem mandaverit? Potius quam prave, & maligne cum Heterodoxis, Flaminius recte, & cordate hac in re sensisse dicendus est cum quatuor illis Cardinalibus, quos, inter præstantissimos a PAULO III. creatos, Pallavicinus lib. III. cap. 17. hoc modo simul jungit, *un Contarino, un Sadoletto, un Polo, un Bembo*. Emphasis tamen ista in enunciandis eorundem nominibus a Pallavicino adhibita profecto postulasset, ut summa illorum auctoritate fretus, adversus Sarpium, aliosque confidenter pronunciaret, in PAULO III. Nepotes suos ad Cardinalatus apicem diligentis, amore & judicio longe majores exstitisse virtutis partes, quam consanguinitatis. Nec abs re fuisset affirmare, eosdem naturæ donis cumulatissimos, cunctorum de se opinionem, & vota plane fallere non potuisse, quod præter illa, ob oculos haberent in Sanctissimo Avo domesticum præstantissimæ virtutis exemplum, unde formare se, & fingere ad omnem excellentiam possent; quæ ipsa scripsisse reperimus Card. Sadoletum ad Card. Alexandrum.

CA-

CAPUT III.

*De PAULI III. æquitate, & prudentia in Anglicani
Schismatis per Henricum VIII. invec̃ti negotio.*

NESCIO satis mirari, Jacobum Augustum Thua-
num culpam omnem turbatæ per Henricum
VIII. in Anglia religionis, potius quam in ipsum
Regem, in Romanos Pontifices rejicere. Narrans
siquidem Historiar. sui temp. lib. I. qua ratione su-
premam ille in Ecclesiasticis Regni sui rebus pote-
statem, ea eliminata, quæ ad Romanum Pontificem
pertinebat, sibi adscripserit, mox subdit: *In reli-
qua vita ita se gessit ille Rex, ut eum, si æquiores,
& prudentiores Pontifices nactus fuisset, sponte
se subjecturum ipsorum potestati fuisse appareret.*
Docilis, morigerique animi laudem in accipiendis
conditionibus, molli licet imperio sibi propositis,
nemo alius Henrico VIII. adjudicavit, quod ego
quidem sciam, qui contra novi, Historicos pleros-
que omnes testari, eundem ita placitis suis præfi-
dere assuetum, ut arrogantia non ferenda labora-
ret. De eo ita in Opere *Histoire de la Reforma-
tion de l'Eglise d'Angleterre* Gilbertus Burnetius:
*Son impétuosité naturelle fut ensuite fortifiée par
une vanité insupportable, & par l'opinion extra-
vagante, qu'il avoit de sa propre capacité. Ce qui*

E

le

le rendit un des hommes du monde le plus difficile à servir, & le moins capable de recevoir des conseils. Hæc ille habet in Operis illius Præfat. in qua pariter de Henrici vitiis plura adnotat, quæ quidvis aliud quam tractabilem ipsum, quam facilem ad aliena, potius quam sua, consilia sequenda demonstrant. Thuani de Henrico Rege iudicium illud improbandi, & refellendi in Diatriba mea altera occasio non defuit, ibique diserte affirmavi, æquitatis, quam a Pontificibus in Henrici rebus abfuisse pronunciat, se in referendis eorundem gestis prorsus expertem eo iudicio declarare; nec omisi ibidem monere, ab historica eundem fide desciscere, dum Henrici obitum his verbis enarrat lib. III. *Sub initium bujus anni V. Kal. (1547.) Henricus Angliæ Rex fato concessit, princeps omnibus naturæ bonis cumulatissimus, & in quo, si in voluptates solutior non fuisset, nihil merito desiderare posses.* Tyrannidis, & crudelitatis metam extremam attigisse Regem illum, nemo in dubium revocaverit. Hæc autem scelera, præter foedissimas voluptates, quibus se dedit, & præter impietatem, qua Romani Pontificis primatum execratus fuit, vel ex se sola ostendunt, plura ei defuisse, quæ in suo Principe jure, ac merito Anglia posset desiderare. Demum (ut hoc etiam addam) Thuano ibidem exprobravi comparisonem, quam instituit inter Henricum
hunc

hunc, & Franciscum I. Galliarum Regem, eodem his verbis conjungens: *Accedebat ad hæc morum, & naturæ tam conspirans similitudo, quam in fortuna dispari, ut nulla inter duos Principes, vel temporum quovis intervallo disparatos, major usquam commemorari possit. Similitudinem istam vehementer fallerer, si Gallus aliquis reperiretur, qui Francisci Regis glorias memorari posse arbitretur.*

Hicce adversus Thuanum præmissis, tractationem, quam hujus Capitis lemma deposcit, aggredior, ac statim fateor Sarpium, atque Courayerum de inita a PAULO III. in Anglicani Schismatis negotio ratione quadantenus æquius, quam Thuanum, sensisse. Sarpius narrationi suæ hoc initium facit, quod ex Courayeri versione recitabo: *Ce Prince (Henry) s'estant soustrait à l'obeissance de l'Eglise Romaine, & s'étant fait declarer en MDXXXIV. Chef de l'Eglise Anglicane, comme on l'à rapporté auparavant, Paul aussi-tôt après son exaltation fut fortement & continuellement sollicité par l'Empereur, qui ne consultoit en cela que ses propres intérêts, de fulminer les censures contre Henri; & y étoit d'ailleurs excité par sa Cour, qui croyoit par ce moyen ou regagner l'Angleterre, ou du moins la mettre toute en feu. Mais le Pape qui étoit tres experimenté dans les affaires, jugeoit cette de-*

marche peu convenable. Æquior, inquam, hucusque, quam Thuanus, in Pontificem, at iniquus omnino in eundem, dum causam, qua iste adductus tarditati potius, quam festinationi morigeratus est, edisserit. Quod postquam fecisset, narrat, quomodo ex Cardinalis Roffensis supplicio alii Cardinales Pontifici auctores esse non omiserint, ut ferret tandem in Henricum censuras, moxque explicat captam ab eodem de ea re deliberationem: Le Pape néanmoins ne changea pas de résolution Mais pour employer un temperament, dont aucun autre de ses prédécesseurs ne s'étoit encore servi, qui étoit de lever la main, & de menacer de la foudre, mais sans la lancer, & satisfaire ainsi les Cardinaux, & sa Cour sans commettre l'Autorité Pontificale, il fit dresser un Procès & une sentence tres rigoureuse datée du 39. d'Août MDXXXV. dont il suspendit la publication à sa volonté. PAULI III. moderationem, prudentiam, circumspeditionem istam suo etiam suffragio confirmare censendus est Courayerus, quippe qui verbis Raynaldi in Annalib. ad eum an. Maximis autem difficultatibus hanc rem implicitam fuisse docent Acta Consistorialia, hanc notam subjungit: Quoique put- être tous convinssent que Henri se fût justement attiré les Censures, il pouvoit y avoir bien des raisons pour croire qu'il n'étoit pas de la pruden-

dence de les employer. Adeo autem singularis fuit PAULI in cohibendo adversus Henricum anathemate ea lentitudo, ut vel ipse Cardinalis Polus, etsi plenus studii, & amoris erga eundem Regem, non omnino probasse aliquando sit visus agendi rationem illam. Siquidem iste in Epistola ad Aloysium Priolum, recitata in primo Collectionis meæ Volumine, hæc de Rege Henrico scribit, paucis mensibus post anathema illud in scripta jam redactum: De Rege prorsus sentio, nisi ex Ecclesia expellatur, nunquam eum in Ecclesia permansurum. Quod si initio, cum hæc res Romæ agi cœpta est, exclusus fuisset ab Ecclesia, jam tandem rediisset. Et paulo post in exemplum afferens Sacerdotes, qui Oziam Regem festinate expulerunt, simul ac ejus frontis lepram apparere vidissent, Quo (inquit) hæc cunctatio nostrorum Sacerdotum tendat in illo Rege, cujus non solum frontem, sed totum corpus lepra occupavit, non intelligo; nisi forte expectent, ut ipsi omnes a Rege expellantur, aut vita priventur, in quo ipsum minime cunctatorem video. Iisdem fere sensibus loquitur in Epistola alia ad eundem Priolum: Hæc itaque (ait) cum ita sint, ecqua spes reconciliationis cum Ecclesia? Non possum dicere nullam, nisi prius videro, quod in hac causa opportunum semper judicavi, ut Rex timere cogatur, quod facile factu foret, si leges Ecclesiasticæ, quæ in tanto fi-

dei

dei periculo exerceri solent, exercerentur; timor enim ipsum faceret auscultare. Si autem vel momento auscultaret, tum quidem plus spei, quam desperationis haberem. Caveat tamen Lector, ne ista legens, Polum male animatum erga suum Regem existimet; imo vero, ut adnotavi in Diatriba primi illius Voluminis, & alibi etiam, quum eo manifeste tenderent, ut Rex aut in Ecclesia perstaret, aut ex ea ejectus, cito ad eandem rediret, manifestum inde redditur, solum ex sincero adversus eundem amore ea potuisse a Polo conscribi, idque pro certo habuerunt homines omnium sententia lenissimi, Contarenus, & Sadoletus, ut eos tantum nominem, quorum iudicium constat a Polo exquisitum fuisse, tanquam Scriptorum suorum canonem (ut ipse vocat) & Lydium lapidem.

Neque vero in cunctatione illa tantum PAULI III. enituit moderatio, atque circumspectio, sed in reliquis omnibus, quæ ad Regem Henricum in concordiam cum Romana Sede pertrahendum molitus est, atque tentavit toto illo triennio, quo a sententiæ iam scriptæ promulgatione abstinuit. Binæ Legationes, eo temporis spatio Polo demandatæ, apertissime comprobarunt, quæcumque in ea causa egit, considerate admodum egisse Pontificem. Primæ causam dederunt exorti in Anglia motus in Henricum ob religionis res ab ipso innovatas; nam PAULUS III.

Pon-

Pontificii muneris esse censuit, Catholicis ejus Regni, quibus cordi foret avita fides, ac proinde supremæ suæ potestatis ad pristinum gradum, unde illam Rex Henricus dejecerat, restitutio, opem ferre. Itaque Card. Polum ad eas partes ablegavit. Rem ita narrat Scriptor ejus Vitæ: *Legatio ei in Galliam, atque in Belgas, Flandriam vocant, decreta est, ut qui adhuc in Anglia Catholici essent, eos in Ecclesiæ fide retineret. Ad eam rem Cæsar & Galliæ Rex, suam Pontifici opem & auxilium detulerant, atque hic etiam tutum Polo per sui Regni fines iter fore promiserat. Hanc ille provinciam non invitatus accepit, quod adjunctis ad Pontificis Maximi studia tantorum Principum voluntatibus, Henricum Regem ad Ecclesiæ unitatem, & obedientiam revocari posse non omnino diffideret. Quanam, amabo, ratione circumspicius eam Legationem Polo committere Pontifex potuit, quam eandem non ex assensu tantum, sed ex voluntate summorum Principum illorum decernendo? De Regis Christianissimi Oratoribus hæc ille in Epistola ad Rodolphum Pium, Cardinalem Carpentensem: *Antequam Roma discederem, non solum mihi, sed Pontifici ipsi constanter affirmarunt, cum de hac mea Legatione, & de via perveniendi ad Regem cum ipsis conferretur, gratissimum Regi meum adventum fore. De Oratoribus autem**

Ca-

Caroli Cæsaris hæc affirmat in Epistola ad Erardum de Mark, Cardinalem Leodiensem: *Si humanitatis in Gallia gutta aliqua degustata, flumina benignitatis, omnisque humanitatis in Cæsarea ditione nobis promitteremus, merito quidem id facere videremur, nil enim nobis cum Gallis plus quam cum hospitibus in diversoriis publicis, per eorum provinciam iter facientibus fuit; finis vero itineris, si Anglia prohiberemur, Cæsaris provincia ab ipsis Cæsaris Oratoribus proposita fuerat.* Præterea PAULUS Pontifex, ut nihil reliqui faceret, quo placide, si fieri posset, ea Legatio optatum finem assequeretur, Polo ad rem illam opportunum maxime comitem dedit, Joannem Matthæum Gibertum, Antistitem Veronensem, cujus conspectum Regi Henrico gratissimum fore sperabat, ea de causa, quam declarat in literis paulo ante laudatis ad Rodolphum Carpentem: *Quæ si minus ille (de Rege Henrico loquitur) a me initio audire vellet propter alienatum a nostro Ordine ejus animum, adducebam mecum illum, cujus summa officia amoris, & pietatis plena in ipsum Regem exstiterant, dum rerum Romanarum sub Pontifice Clemente gubernacula teneret, quem tota nostra Natio amicissimum semper, & officiosissimum in se est experta, cujus etiam officia sibi gratissima Regem prædicantem sæpe audiveram.* Tandem Pontificis prudentia pariter

riter enituit in Polo post paucos menses ex ea Legatione revocando. Causæ, quibus adductus id fecit, nobis innotescunt ex Contareni literis ad Polum, in quibus hæc leguntur: *Putat Pontifex prudenter omnia, nec videt, rebus Christianæ Reip. ac Principum, ita ut sunt, constitutis, cum Turcarum Princeps omnibus viribus collectis in nos ducit & amplissimum, simulque potentissimum exercitum, ac ingentem classem, posse nos quidquam sperare. Præterea multum tibi timet in iis regionibus degenti, quem censet summa diligentia servandum esse, veluti pretiosum thesaurum, ut ejus verbis utar, cum aliis rebus ac commoditatibus Ecclesiæ, tum melioribus temporibus. Ideoque appetentibus etiam Calendis Novembribus, quibus indictum Concilium est, reor eum decrevisse, ut ad nos tuto redeas. Aget autem de hac re diligenter & cum Serenissimo Romanorum, & cum Christianissimo Gallorum Regibus. Quis unquam diffitebitur, PAULUM Pontificem ita se gerentem, primo in decernenda, deinde in dirigenda, demum in concludenda Belgica illa Poli Legatione partibus omnibus prudentioris circumspeditionis satisfecisse?*

Elapso jam triennio, PAULO III. in religionem venit quælibet cunctatio, quæ diutius anathematis illius publicationem remoraretur; quare die 17.

Idia

F

Dec.

Dec. an. 1538. sententiam in Henricum Regem emisit. Attamen una simul novam Polo Legationem credidit ad Carolum Cæsarem in Hispanias, & ad Franciscum Regem in Gallias, quo veritus Henricus eorum Principum adversus se foedus, ad saniores mentem rediret. Hoc vere fuisse Pontificis consilium, ex summa utique animi moderatione, & æquitate profectum, docent nos partes in ea Legatione Polo mandatæ, & rei, dumtaxat de compacto cum utroque illo Principe gerendæ, capta deliberatio. Omnino lenibus, omnino aptis ad Henricum ex Christianæ caritatis lege juvandum instructum fuisse Polum ab eodem mandatis, fidem apertam faciunt hujus Epistolæ omnes ad Legationem illam spectantes, quæ pariter evincunt, nihil in iis mandatis absonum, nihil inconsultum, nihil contra fas, jusque civilis Imperii, ambos eos Principes videre sibi visos fuisse, hosque proinde Romanæ Sedis potestatem, cujusmodi PAULUS III. in Henricum exercuit, haudquaquam averfatos fuisse, nec eis adfuisse seu doctores, seu suafores, ipsam averfantes. Caruit quidem successu Poli Legatio, non tamen ex vocata in invidiam ea potestate, sed quoniam, ut Scriptor Gallus (paulo post nominandus) affirmat, Principes quoque præferre sæpius in more habent, *comme les autres hommes, l'utile, & le present à l'honneste & au futur*. Quod dixi, nihil

nihil, nisi æquum, & bonum, a Pontifice in ea Legatione Polo demandatum fuisse, quin opus sit ad alias Epistolas confugere, satis constare faciam ex Apologetica ejusdem ad Eduardum VI. Angliæ Regem, in qua hæc leguntur: *Cum utroque autem Principe sic egi, ad id utrumque semper hortatus sum, ut amoris & amicitiae rationem potius adhiberent, qua amicum & fratrem graviter lapsum erigerent, erectumque in regio statu confirmarent; quam, ut odii, & inimicitiarum armis uterentur, quibus eum opprimerent, atque spoliarent. Hoc ego nunquam profecto volui, neque cum illis egi: sed intelligens, quantum eorum vel exemplum vel auctoritas in tam honesta piaque causa valere posset, ab utroque id contendi, ut omni auctoritate & gratia apud illum niterentur, ne diutius in sua a communi omnium matre Ecclesia defectione perseveraret, neque a reliquis Christianis Principibus hac in re sejunctus esse vellet. Quod si tentatis omnibus amoris, & benevolentiae officiis, nihil se proficere viderent, tum quidem non negabo, suasisse me ut minas etiam adderent, & ab omni cum eo usus & commercii genere prorsus abstinerent. Quod autem in eo negotio nihil agere Pontifex statuerit, nisi confociatis cum utroque eo Principe consiliis, quodque isti ad opem religionis causæ, eo auspice, ferendam se paratos esse pluries, & diser-*

te contestati fuerint; hæc, inquam, adeo patent ex Poli Epistolis, ut nulla fere sit, quæ & illius Pontificis proposito, & Principum illorum pollicitationibus testimonium non perhibeat. Illæ etiam addunt, Polum instituisse, ut ipse, ad Regem Christianissimum profecturus, certum aliquod de prona Cæsaris voluntate documentum afferre posset, cuius si compos factus fuisset, nihil tunc ei foret dubitandum, adventum suum illi Regi gratissimum futurum, ut de ea re certiores se fecerat Pontificius apud eum Ablegatus: *Quod (inquit) quo pacto fieret, nisi aut Cæsar per literas hoc significaret, aut certum hominem ex suis una mecum, qui hoc testaretur, ad Regem mitteret, ipse quidem nihil video.* Ita ipse in Epistola ad Contarenum, in qua consequenter subdit: *Et quid minus a Cæsare potest postulari, præsertim cum verbis hoc jam promittat facturum?* Ad hæc ipsa gestæ a Polo in Hispania Legationis tempora spectat novum singularis moderationis argumentum a PAULO III. editum. Imprimendum Pontifex curaverat, Polo insciente, dum Roma is abesset ea fungens Legatione, Opus ab eodem compositum de Ecclesiastica Unitate; at veritus, ne, in manus hominum veniens, Henrici animum magis, magisque in furias ageret, Polo ex eadem reduci libenter indulgit, ut quod satis esset spatii ad præmium eidem apponendum caperet, atque

atque interim ejus libri exemplaria apud eorum Auctorem custodirentur. Inde autem consequutum est, eadem toto PAULI Pontificatus tempore suppressa latuisse; quod profecto demonstrat, optimum hunc, & sapientissimum Principem cavisse, ne impositam Henrico plagam, quam remediis sanare non posset, irritamentis exasperaret.

Ejusmodi Principum dictis, etsi ea ipsorum facta non responderint, quæ religionis utilitas exigebat, respondit tamen quadantenus assensus, quem iidem præbuerunt, ut suis in ditionibus Pontificia illa sententia publice exposita compareret. Assensum illum in dubium revocare non est ausus Burnetius in sua Nicolai Sanderi, qui Anglicani Schismatis Historiam conscripsit, refutatione: *En cela (ait il-le) il rend un bon office au Siege de Rome; pûsqu'il il transmet a la posterité un témoignage; que trois Souverains (præter Galliam, & Belgium, in Scotia quoque ea sententia fuerat vulgata) ont reconnu dans le Pape la puissance de deposer les Roys. Mais il eût mieux fait de dire simplement, que les Papes ont ce droit, que d'en rapporter une preuve aussi foible que celle-la.* Quam probationem ut vere infirmam demonstret, affert exemplum Excommunicationis in Reginam Angliæ Elisabetham Londini affixæ, quin tamen inferre liceat, *que la Reyne Elisabethe a esté d'intelligence avec le Pape*
qui

qui l'excommunia . At nullius omnino roboris esse exemplum istud, etsi multifariam ostendi posset, satis certe constat ex narrata superius inter Pontificem, & Principes illos in negotio, de quo modo agimus, consiliorum communicatione, quam nemo dixerit intercessisse inter Elisabetham Reginam, & Pium V. Pontificem, qui excommunicationem illam intentavit. Quod vero subdit Burnetius: Un homme ne raisonnera-t-il pas plus juste, s'il conclut, que puisque ces mêmes Princes continuèrent de vivre avec une bonne intelligence avec Henry, ils mépriserent la sentence du Pape. Ratiocinationem hanc a Burnetio propositam refelli ab Abbate Joachimo le Grand in Opere, Histoire du divorce de Henry VIII. T. II. prodidi in Diatriba mea altera, ibique adnotavi, Scriptorem hunc (qui ipse ille est, cujus verba paulo ante, tacito nomine, recitavi) acceptissimum fuisse, dum viveret, Parisiensis Aulæ Primatibus, quorum aliqui, & ii præsertim, quorum erga me Lutetiæ triginta & amplius ab hinc annis plurima existerunt officia, plena suavissimi studii, sospites modo supersunt; hosque utinam diutissime adhuc Deus sospitet. Hic vero juvat fusiores ex eo ipso Scriptore locum exscribere, qui hujusmodi est: Le raisonnement de Monsieur Burnet est fort specieux, & il auroit toute la vrai-semblance imaginable, si les
Prin.

Princes étoient toujours bien instruits de leurs intérêts, ou plutôt s'ils ne préféreroient pas, comme les autres hommes, l'utile & le présent à l'honneste, & au futur. On a vu par la Lettre de Castelnau Evêque de Tarbes, la proposition qui fut faite à François I. de la part de Charles-Quint, de s'armer conjointement avec le Pape contre l'Angleterre. François premier écouta la proposition, comme je le voy par les Lettres de Monsieur de Marillac, qui luy mande que les Ministres Anglois se plaignant du refroidissement qu'ils appercevoient dans son amitié, disoient, que comme ils avoient sçu &c. Postea recitat ex aliis ejusdem Marillacii literis verba ista, Henrici Regis pavorem testantia : Pour réparer les erreurs passées, ou bien pour satisfaire à ce peuple & aux Potentats Chrétiens, qui pourroient par là prendre occasion de luy courir sus, il a remis sus toutes les opinions & constitutions anciennes, excepté seulement l'obéissance du Pape, & réduction des Abbayes & Eglises dont il a pris le revenu. Ac demum concludit : On voit par là si les Princes aprouvoient, ou non, la conduite de Henry; s'ils n'apuyoient pas les desseins du Pape. Aussi François & Henry entrans en défiance l'un de l'autre, commencèrent à se fortifier & à se préparer a la guerre. Quoniam igitur in controversiam vocari nequit Principes illos probasse PAULI III. consilia,
in-

infelix eorundem successus nihil officiet, quominus illa profecta fuisse intelligantur ab animo & Pontificiæ potestatis pro viribus tuendæ studio, qualem certe decebat supremum religionis Antistitem profiteri, & una simul alieno a Principum juribus lædendis, turbandaque inter Sacerdotium, & Imperium concordia. Hanc contra pessimo inducto exemplo convellere in Angliæ Regno ausus fuit Henricus ille, ista etiam de causa omnium Principum, omnium gentium, omnium sæculorum vituperatione dignissimus.

Tandem vel absque aliarum probationum subsidio PAULI III. in Anglico negotio admirabilem sapientiam, dum eam Henricus, scelera sceleribus cumulando, tentare nunquam desisteret, commendat ipsum anathematis diploma, sive additamentum ipsi factum post decretam illius promulgationem, nam ita incipit: *Nos qui, ut hominum natura fert, facile credebamus, quod desiderabamus, dictam executionem suspendimus: sperantes, ut nobis spes data erat, ex ipsa suspensione correctionem, & resipiscentiam, non autem pertinaciam, & obstinationem, ac majorem delirationem, ut rei effectus edocuit, proventuram. Cum itaque resipiscentia & correctio hujusmodi, non solum postea sequuta non sit, sed ipse Henricus Rex quotidie magis se in sua feritate, ac temeritate confir-*

firmans, in nova etiam scelera proruperit, &c. Pia-
culum Henrici in S. Thomam Cantuariensem, quod
Pontifex amaris illico verbis describit, nec Sarpius
diffitetur, quin iste iuste fuerit execratus; at quod,
eo ejusdem diplomatis verbis exposito, addit, ce qui
étoit toucher à un des mysteres du Pontificat bien
plus important que le concile même, haud vel ipsius
Courayeri suffragium promeruisse videtur; imo non
abs re erit credere, hunc in ea insectatione depre-
hendisse un peu trop trop de malignité, ut ejus verba
superius recitata usurpem. Namque nihil habet ille
de eo mysterio in suis notis, & solum adnotat quæ
sequuntur: Je ne scais a qui en veut le Cardinal (Pal-
lavicius) d'accuser ici Fra Paolo d'approuver tous
les excès de Henri VIII. Il n'ya pas un mot dans
tout le recit de notre Historien qui puisse faire
soupçonner qu'il approuva les fureurs de ce Prince.
Il raconte simplement le fait, & les reflexions qu'
il ajoute sont plus propres a faire honneur à la pru-
dence de Paul qui le fit differer si long tems cette
Bulle, dont il prévoyoit bien, qu'il ne devoit atten-
dre aucun succès, qu'a justifier le Prince contre qui
la Censure étoit portée. Postrema hæc verba tantum
absunt a veritate, quantum absuit ea Censura ab
Henrici criminibus dissolvendis, seu ab Henrico
purgando, saltem penes Carolum Cæsarem, & Fran-
ciscum Galliarum Regem, quod facile ediscere po-
terit

terit Courayerus ex iis, quæ superius paulo ante a me sunt allata de communicatis inter ambos eos Principes, & Pontificem consiliis ad minas & vim adhibendas, quibus Rex ille adductus ad cor demum redire cogeretur.

Sarpii autem verba illa, *c'étoit toucher à un des mysteres du Pontificat*, satis refutantur ex iis, quæ in Poli Apologia ad Carolum, a me primum edita, habentur; nam ibi de perpetrata ab Henrico in corpus S. Thomæ impietate describuntur quæ profecto legentibus terribilem horrorem incutiant, ac proinde mysterium non commentitium Romani Pontificatus, sed germanum iniquitatis Satanicæ repræsentant. *Audivisti vero* (ita ille incipit) *Cæsar, nec enim rem obscuram, aut ignotam profero, sed propter insignem & singularem impietatis rationem, omnibus notam & divulgatam. Audivisti, quæ in sacrum illud sacrati hominis corpus, in Divi Thomæ sepulchrum, & corpus, impietatis indicia edidit. Audivisti primum hoc sacrilegii genus, cum Mausolæum tot donariis Regum, Principum, & populorum refertum diriperet, & spoliaret. Sed de hoc non loquor. Et paulo post: Verum ut postea hominis ossa (nihil enim hic amplius dicam) tot ante eum seculis mortui erueret, igni traderet, in cinerem redacta, per contumeliam postea in ventum spargeret, an ullum similis crudelita-*

litatis exemplum inter homines unquam est letum? Certe si ipse, qui in historiis aliquando legi, sententiam proferre debeo, vix credo, si inveniri possent ab aliquo Trojano ossa ejus, qui primus flammam ad comburendam Trojam excitavit, post tantum temporis intervallum adeo crudelem futurum, ut in ossa ejus sæviret, ut semel sepulturæ tradita ex sepulchro ejiceret. Ac insuper: De Herode crudelissimo Tyranno a quibusdam scribitur, Jo. Baptistæ ossa in cinerem redacta, & in ventum sparsa. Hujus fortasse exemplum eum monuit, quod tamen nec impietate, nec crudelitate cum hujus factō est comparandum. Ille enim quod fecit, etsi crudeliter, in inimicum fecit, & eum, qui eum læserat, conjugium illius palam improbaverat, non fecit in eum, quem aliquo adhuc miraculo Deus ostendisset sibi carum esse; nec enim tunc Joannes miracula ediderat. Ideo nec impietate cum hujus factō comparandum, quod erga Dei amicum, tot seculorum consensu probatum, tot miraculis confirmatum, & eum, qui, ut nunquam læserat, sic nec lædere poterat, quoniam tot seculis & natus, & mortuus erat, ac in Cælum receptus, & semper pro singulari ornamento, & Patrono Regni habitus. Addit tandem eo execrabiliorem judicandam esse Henrici VIII. impietatem, quo laudabilior haberi debet Henrici II. religio in peragenda pœnitentia

coedis ejusdem S. Thomæ. Inter pœnitentiæ autem ejus signa affert murum magno sumptu ab ipso erectum ad D. Pauli Templum, qui sua quoque ætate extaret, cujus tamen nostra nullum comparet vestigium. Eam Apologiam, alibi monui, Polum in otio Carpentoractensi lucubrasse, imperfectamque eandem reliquisse, ac pro ipsa Apologiam aliam, inscriptam scilicet Regi Eduardo, Operi suo de Unitate Ecclesiastica præmittere consultius existimasse, dum post obitum Regis Henrici, de illo in lucem proferendo ageretur, Augustano præsertim Cardinale, Otthone de Trucses instante.

Demum Caput concludens, Lectores, apertius quam antea fecerim, hic monendos puto, ex concordibus adversus Henricum consiliis inter se initis a PAULO Pontifice, Carolo Cæsare, & Francisco Rege, omnino consequi, Principum istorum jugulum peti eo ipso telo, quod in solum PAULUM vibrare se autumant Ultramontani Theologi plerique, ac Jurisconsulti clamantes, *eum Pontificem in condendo diplomate illo suo non ad doctrinam, & traditionem Ecclesiæ Romanæ, sed duntaxat ad stylum, usumque Romanæ curiæ attendisse.* Quibus Theologis, & Jurisconsultis hæc Sadoleti in Epistola ad Cochlæum regeant verba: *Utinam tam mores nostri probati essent hominibus, quam est Pontificis potestas sine ulla dubitatione maxima.*

CAPUT IV.

De curis PAULI III. pro Ecclesiae reformatione, Concilii Oecumenici convocatione, concordia Principum Christianorum, horum fœdere adversus Turcas, deque itineribus ob eas ipsas causas, ætate admodum senectâ, ab eodem susceptis.

SADOLETI verbis quemadmodum proxime præcedens Caput absolvi, ita præsens exorsus, Deo omnipotenti maximas, meritaque gratias agendas esse fateor, qui populo suo tam necessario tempore, talem Pontificem præficere est dignatus. Hæc ille de PAULO III. in gratulatoria ad eum Epistola, qua Christianis omnibus nationibus, potius quam eidem ad fastigium illud evecto, mirum in modum plaudat, quod Pontificem sint nactæ, integra fama, summa virtute, singulari sapientia præditum, habiturumque amplam facultatem sese in maximis humani generis utilitatibus, & commodis exercendi, Pontificem talem, cujus electio non hominum consiliis, sed divinitus facta vel ex hoc uno noscî posset, quod nullo prævio Comitiorum æstu illa contigerit, quo ipso die ea inchoata fuerunt; ea enim, ut interpretatur idem Sadoletus verbis initio Cap. I. laudatis, celeritas renuntiationis manifesto documento fuit, tarda molimina nec rei, nec temporibus convenisse, siquidem tanta, tamque eximia virtus, quanta in

PAUL.

PAULO III. semper fuit , ad tantos rerum motus , quibus Resp. jactabatur , quoad homini liceret , cohibendos , quam primum , & quam maxime foret necessaria . Cui divino consilio , summæque hominum de se expectationi , Sanctissimus ille Pater vel primis accepti honoris diebus respondere statim aggressus , Pastoralem sollicitudinem suam mox in eas omnes partes diffudit , in quas pervadere oportebat Pontificem , orbis terrarum universam salutem animo complectentem . Primæ omnino ejusdem Pontificatus curæ cujuscemodi fuerint , Sarpium testantem audiamus : *Dans le premier Concistoire qu' il tint le 12. (13. corrigit Courayerus ex Raynaldi Annalib.) de Novembre il remit sur le tapis l' affaire du Concile , & dit : Qu' avant toutes choses il falloit procurer l' union des Princes Chrétiens , ou du moins qu' il donnassent quelque assurance que pendant le tems de sa tenue ils ne prendroient point les armes : Que pour cet effet il vouloit envoyer à tous des Nonces pour traiter avec eux de cet article , & de tous les autres , dont les Cardinaux avoient fait mention . Il rappella aussi d' Allemagne Verger , pour être informé de l' état des choses en ce pais , & députa les Cardinaux de Sienne , de S. Severin , & Cesis , tirés des trois ordres du sacré Collége pour délibérer sur l' affaire de la reformation . Il ne tenoit même aucun Concistoire , où il ne parlât long-tems*
sur

*sur ce sujet, & où il ne répétait souvent qu'il étoit nécessaire de commencer la réforme par sa Cour, & principalement par les Cardinaux. Hucusque Sarpus ad Historicæ veritatis fidem, a qua tamen ablu-
dunt quæ a malevolis in vulgus spargebantur ad-
versus PAULI sermones illos, quos aliqui prenoient
(subdit Sarpus) pour un artifice, croyant qu'il n'en
usoit ainsi que pour engager sa Cour & les Cardi-
naux a faire naître des obstacles au Concile. Ablu-
dunt, inquam, & quidem vehementer, nam rectis-
simam Pontificis in utroque illo negotio voluntatem
series Gestorum ejusdem in Raynaldi Annalibus ex-
posita, & in Pallavicini Historia adversus Sarpium
vindicata, apertissime comprobant, nec levioris pon-
deris erunt ad eam ipsam evincendam testimonia,
quæ ex Poli Epistolis, ut instituto meo adhæream,
in medium modo proferam.*

Plura illæ produnt de suscepto a PAULO III. confi-
lio, in ipsis Pontificatus primordiis, doctos scilicet,
sanctosque Viros Romam accersendi, quorum opera
corrigeretur, ac restitueretur Ecclesiastica discipli-
na, expeditiorque cogendi Œcumenici Concilii via
aperiretur, ostenduntque propterea ab omni pror-
sus verisimilitudine nihil magis alienum dici posse,
quam PAULUM III. sanctas illas cogitationes, de qui-
bus Sarpus, cum Cardinalium Collegio commu-
nicantem, nihil minus, quam de felici earundem
exi-

exitu fuisse sollicitum. Simulationis larva, si quam ille ad eam rem induisset, non erat cur eundem adigeret ad capienda ita operosa, ita sumptuosa consilia, cujuscemodi fuerunt, Caraffam, & Cortesium, Venetiis advocare, Polum Patavio, Gibertum Verona, Eugubio Fregosium, demum e Gallia Sadoletum: quibus omnibus tres alii, qui Romæ aderant, adjuncti, scilicet Contarenus, Aleander, Badia, celeberrimum illum Conventum conflarunt, quo certe non alius doctior, non alius sapientior cogi potuisset. Tanta, inquam, molitione PAULI solertia non eguisset, si id unum ipsi statutum foret, ut homines in iis rebus ludificaretur. Sincero contra studio, candidoque omnino pectore Pontificem in Viris illis evocandis processisse, illud etiam satis ostendit, quod Sanctæ Obedientiæ præceptum, ne iidem fas sibi esse putarent, vocanti non auscultare, aut saltem morasnectere, adjungendum ille putaverit. Ejus præcepti mentionem faciunt PAULI ipsius literæ, inter quas ad Polum exaratae; nam harum hæc est clausula: *Cum æstivus fervor paulisper refrixerit (quod ex commodo tuo fiat) Romam te conferas apud nos, una cum cæteris electis, ac accitis, qui eodem diligentia, ac studio nostro convenerint, tam utile & necessarium opus adjuvaturus, quod quoniam publice expedit, summeque est opportunum, in virtute quoque san-*

sanctæ Obedientiæ hoc tibi mandamus. Vinculum hoc, quo PAULUS literis suis pondus addidit, ne evocati tergiversarentur, æque idoneum esse deberet frænandæ eorum impudentiæ, qui laudatissimis ejusdem studiis obstrepere, suspiciones malevolentiae plenas in vulgus spargendo, non verentur. Eo Polus quum se obstringi sensisset, statim Pontificiis mandatis morigerum se præbuit, miratus primum incredibilem erga se PAULI III. benignitatem: Ut enim (inquit Apostolicis literis illis respondens) cæteræ causæ adessent, quæ maxime desunt, quæ T. S. ad me accersendum adducerent, illud quidem certe, quod alias abs Te non minore benignitate per literas accersitus, non venerim, sed causas, & tergiversationes quæsierim, non modo Te ab eo, ut me cum honore accerseres, alienare, sed ultro etiam venientem repellendi justissimam causam præbere potuit. Nunc vero, ne iterum subterfugerem, Te prospexisse video, qui me sic istis literis adstrinxeris, ut nisi obedientiæ vincula omnia erga Christi Vicarium prorsus rumpere velim, nullus sit omnino tergiversandi locus, quod absit, ut unquam coner. At recitare præstat responsi illius etiam initium: Ad VI. Calend. Augusti accepi literas Sanctitati s Tuæ, ex quibus ea primum intellexi, quæ me totum ad gratias Christo agendas converterunt, quod talem animum Vicario suo, & pastori ovium sua-

H

rum

rum dederit in convocandis ad omnium salutem Principibus gregis, qualem jam multos annos cum universus Christianus populus optaret, & summo studio flagitaret, quod in eo remedia omnia, quæ tot malis, quibus misere premitur, mederi possent, posita esse viderentur, nullum tamen ante hoc tempus tam salutaris desiderii sui solatium habere potuit. Itaque nunc tua voluntate patefacta, cum maxima, ac prope certa spes ostendatur, brevi fore, ut voti compos efficiatur, non possumus non maximas gratias Christi benignitati agere, & Tuæ imprimis felicitati gratulari, cui hoc tam salutare, & omnibus gentibus plausibile munus a Christo, cæteris quasi præteritis, reservatum videmus. Munus illud PAULO III. a Deo Opt. Max. reservatum fuisse Polus ergo clare perspiciebat; at contra Heterodoxi, & nonnulli etiam ex nostris, acutius se cernere jactitantes, technas, fraudes, caliditates sibimet ipsis fingunt, quas Sanctissimo illi Pontifici attribuant. Extat pluribus typis excusa ea Novemviralis Consultatio, & quot in eadem a doctis illis Viris digesta leguntur Reformationis capita, tot adsunt tam illorum, quam PAULI Pontificis non seriæ tantum, sed sanctissimæ in Christiana Rep. instauranda voluntatis, & propensi maxime studii argumenta. Quodnam judicium ferendum sit de libello, quem hoc titulo prænotatum, Con-
lium

lium delectorum Cardinalium de emendanda Ecclesia, damnatum reperimus in Romano Indice, adeo multis in utroque meo Volumine differui, ut supervacaneum sit, rem illam hoc loco rursus expendere. Quare solum addam, Launojum in Inquis. in Privileg. Præmonstrat. Ord. aperte de eo Consilio ita scribentem: *PAULUS III. Consilium hoc non ingratum habuit, nec improbavit Joannes Petrus Caraffa Card. Theatinus, postquam Romanus Pontifex nomine PAULUS IV. evasit, nec pervulgatus librorum prohibitorum Index confixit. Oppugnarunt Lutherani quidam, sed Joannes Cocblæus edito libello defendit; hæc, inquam, scribentem, ostendere sibi haud comperta fuisse quæ de Consilii illius fortuna in medium attuli, ubi de eodem egi, omni studio conatus, ut proscriptio, quæ revera in Romano Indice legitur, cadere potius censeatur in Consilii ejusdem explicationes sive ab Heterodoxis, sive a nostris evulgatas, quam in Consilium ipsum. Hoc a PAULO III. plene probatum fuisse certos nos facit ejusdem Editio, quæ cum ipsius Pontificis stemmate e Romanis typis Antonii Bladi Impressoris Cameralis an. 1538. comparuit; & hæc quoque juxta ac proscriptio illa (quod satis mirari nequeo) non Launojum modo, sed tam veteres, quam recentiores plerosque omnes Scriptores latuisse, ut ibidem adnotavi, dignoscitur. Aliud probati a PAULO Consi-*

lii ejusdem argumentum suppetit nobis ex delata intra paucos annos Novemviris illis Romana Purpura, omnibus nimirum præter Contarenum, qui ea donatus jam fuerat, & Gibertum, a quo recusatam fuisse haud levis conjectura est, de qua ego in Diatriba altera ex doctissimis Giberti Operum nuperis Editoribus. Hæc omnia excogitasse & re ipsa perfecisse Pontificem ut scenæ tantum serviret, animo autem *pour engager sa Cour & les Cardinaux à faire naître des obstacles au Concile, à fin d'éloigner par là la reformation*, hoc certe affirmare quis nequit, quin prius verecundiam omnem exuerit. Paucos dumtaxat menses post habitum Conventum, de quo modo dictum est, quoniam novo documento PAULUS III. comprobaverit, nihil se antiquius habere, quam Reformationis opus ad exitum perducere, testis adest Contarenus in Epist. ad Polum data die 12 Maii 1537. *Pontifex (inquit) aggressus est Reformationis negotium; cœpit a se ipso, elegitque quatuor Cardinales, Simonetam, Ginnucium, Theatinum, & me, quibus injunxit, ut diligenter videamus, & corrigamus ea, quæ expediri consueverunt per Datarium. Nos non deerimus officio Christianorum præsulum. Omnes fere Reverendissimi Cardinales favent Reformationi; incipit immutari facies Consistorii, ea quæ proponuntur non ita facile expediri incipiunt, Canones*

nes proferuntur, perpenditur quod fieri debet, & quid non fieri; adeo ut magnam spem, non dicam conceperim (quia nunquam desperavi) sed foveam, res nostras quotidie melius processuras. Summo opere cupio te, ac Reverendissimum Carpenssem, nobis adesse, ut pluribus operam dantibus Resp. Christiana facilius instauretur. Ex eadem Contareni Epistola discimus veram causam, quæ Pontificem impulit ad differendam Concilii Mantuæ indicti convocationem usque ad Calendas Novembr. anni, cuius notam eadem præfert, quod scilicet Dux Mantuæ petiisset a Pontifice mille & quingentos pedites alendos Pontificis pecunia ob civitatis Mantuanæ præsidium, quæ res (inquit) visa est allatura fuisse calumniam nobis, utpote qui nollemus Concilium liberum, si armati hoc præsidio venissemus. Merito igitur Sarpio aliam afferenti causam, jurisdictionis scilicet, quam Mantuæ Dux exercendam contenderet a suis, non vero a Concilii administris, Pallavicinus contradicit, nec ab hoc dissidet Courayerus, monens tamen, in Bulla Indictionis Tridentinæ verba quædam legi, Sarpii narrationi haud parum consentanea. Mihi vero satis est in Contareni Epistola illa adnotare, justis semper de causis adductum fuisse PAULUM Pontificem ad Concilium differendum, etsi sincera prorsus voluntate tam illud quam Ecclesiæ Reformationem exoptaret.

Con-

Contarenus enim de ea re testimonium perhibens, laud certe idoneus fuit, cui quisquam in huiusmodi negotiis, quæ Romæ tractabantur, fucum faceret, aut ipse fuco aliis faciendo accommodatus, quem videlicet jure Pallavicinus lib. IV. cap. V. pro Sacri Collegii Catone habitum fuisse affirmat, ubi de eo loquens, in hunc modum scribit: *Quel famoso Catone del Collegio, e nulla dissimulatore dell'imperfezioni conosciute nel Clero, e nella Corte, come testificano e gli Scritti di lui, e gli altrui Scritti sopra lui.* Eam Pontificis sinceritatem adeo Polus quoque pro certa habuit, ut die 20. Maii anni illius 1537. Contareno, qui reditum suum e Belgio Concilii causa urgebat, ita scripserit: *Jubet, ut, quod commodo meo, & causæ facere possim, reditum maturem, ut in sacro Concilio Mantuæ celebrando præsto esse possim, quo ut ex ratione dierum colligo, multo ante Sanctitatem Tuam puto perventuram, quam ei hæc literæ reddi possent.* Præterea respondens Contareni Epistolæ paulo ante laudatæ, valde animum suum exhilaratum fuisse fateatur, certior ab illo factus, *Pontificem ardentem perseverare in ipso suo instituto, & optimo suo animo de Reformatione.*

In eo utique PAULUM Pontificem vere perseverasse testatus est idem Polus Romam e Belgio redux in pluribus literis ad Cardinalem Leodiensem exaratis,

tis, quæ omnes in unico argumento versantur, in facultatibus scilicet admodum amplis, quas illi Polus a Pontifice impetravit, ut concessam Legati de latere potestatem ad Cleri sui reformationem in Exemptos etiam libere posset exercere. Inter cætera hæc habet: *Maxime delectari Ejus Sanctitas hoc sermone est visa, quæ eundem animum erga Reformationem universalis Ecclesiæ ostendit, quem Illm̃a D.V. erga suam. Sed cum quasi parvum navigium tranquillo mari sit Ecclesia Illm̃æ D.V. facile fructum tam pii desiderii omnes sentiant, Illustriss. D.V. brevi, ut spero, faciet, quod in tam magna navi, tot fluctibus agitata, qualis est Ecclesia universalis, tametsi Sanctitas Ejus fructum semper amittere non potest tam piæ voluntatis, tamen sentiri non tam facile potest, præsertim cum tam multos præterea hostes habeat. Sed Sanctitas Ejus quo plura impedimenta videt, hoc plus juvabit. Nunc habet hoc sacrum fœdus, quo Turcas est aggressus una cum Venetis, & Cæsare. De Concilio vero generali proximo mense Majo incæpturo, nulla res spem ejus potest diminuerè, quanquam hæc bella inter Principes videntur debere omnem spem tollere. Sed Sanctitas Ejus optimam spem concepit etiam de pace, quam non cessat sollicitare, & per novos Nuncios suos, quos post meum hoc adventum ad utrumque Principem,*
&

Et per Venetos, qui etiam ex suis, quod alias non fecerunt, duos Nobiles per equos dispositos ad utrumque etiam Principem miserunt, ac Sanctiss. Dom. Civitatem Vicentinam, Concilio celebrando maxime idoneum locum, concesserunt. Datae sunt eae Epistolae partim desinente an. 1537. partim ineunte an. 1538.

At nulla ex Poli Epistolis, quas prima duo Collectionis earum Volumina offerunt, magis comparata ad comprobandas fervidas PAULI III. curas in universam Christianae Reip. salutem, quam binæ datae ad Camillum Ursinum, prior quidem die 14. Januar. 1538. altera die 21. Mart. ejusdem anni. Camillus ille, de quo in ejus Vita Italico idiomate conscripta ab Josepho Horologio, ac Venetis typis edita an. 1566. disertis verbis affirmatur: *Che Camillo Orsino sia stato non pure il maggior huomo che nascesse dell' Illustrissima familia Orsina così nei maneggi di guerra, come nei governi de popoli, ma ancora che fusse mai in tutta Italia, tanta præterea Christiana pietate insignis fuit, ut in ipso Populus reveritus sit sanctissimum morum præfectum, cui proinde, & nemini magis, conscientiae suae latebras aperire in iisdem literis comperitur. At quod spectat ad hujus Capitis argumentum, eae ipsae, ut dixi, certos nos reddunt, PAULI III. in maximis terrarum orbis curandis utilitatibus ita incensum, ita fer.*

fervidum fuisse studium, ut nihil magis in ipso desiderari potuisse sibi facile persuadere possint veritatis amatores. Eas literas, quas a Camillo Polus acceperat, censuit iste potius, quam literas, consiliorum, atque exhortationum volumen, hocque nomine easdem insignivit, ut constat ex ipsius responso. Quare eidem consultius visum est, plura earundem exemplaria confici, quæ scilicet cum Contareno, & Caraffa communicaret; nam ambos istos in negotio tractando cum Pontifice Polo consortes esse Camillus optaverat. Æque etiam omnes inter se consortes fuerunt in iudicando, earum literarum scribam dumtaxat fuisse Camillum, authorem vero illum, qui mutos loqui facit, & ora obstruit disertorum, cujus nempe tota foret causa illa, quæ in literis illis tractabatur. Itaque sic persuasum habentes, Pontificem eo die, quem iste iis constituerat, adeunt, referentesque eidem copiosissimarum earum literarum singuli partes singulas (nam tripartito illas inter se diviserant) auditi primo fuerunt maxima cum animi intentione a Sanctitate Sua, deinde ab ea responsum tulerunt, cujus summam nobis servavit una ex binis illis Poli Epistolis, habendam utique ceu monumentum auro contra æstimandum, ac propterea dignum, quod recitatis ipsismet Poli verbis huc afferatur. Ea hujusmodi sunt: *Cujus* (Pontificis responsi) *summa hæc fuit: Cum*

plura in dies divina bonitas suæ voluntatis indicia, in restauranda afflictæ Ecclesiæ salute præbeat, quæ quotidie magis magisque omnium bonorum animos ad majores gratiarum actiones accendere debent, tum vero in iis non minimum signum, vel potius maximum se agnoscere, quod de abundantia divinæ gratiæ, effusione ejus in te spiritus accepit. De quo etsi magnam causam habet præter cæteros gratulandi, vel antiquæ amicitiae, vel propinquitatis, quod in te sanguine sibi conjuncto hanc tantam suam misericordiam ostendere est dignatus, tamen multo majorem esse lætitiā, quam, ut Pastor Ecclesiæ universalis, hac de re accipit, in cujus bonum publicum, & commune, hæc in te dona Christum Ecclesiæ Sponsum effudisse sibi persuadet, & eo magis, quod videt, quantum Respublica Christiana opus habet his temporibus tali & Viro, & belli duce, cum contra infideles sit pugnandum. Adeo ut, si de quoquam, adjuvante Dei gratia, magna sperare debet, de te quidem maxima, cui Deus ea spiritus dona dederit, quæ in tuæ professionis hominibus jam multis sæculis non sunt visa, & in te cum summa omnium admiratione divinæ misericordiæ, & potentiæ tanquam rarissimum miraculum spectabantur. Quare se primum infinitas gratias infinitæ, & inexhaustæ Dei benignitati agere, qui tali tempore de
tali

tali duce Ecclesiæ suæ prospexit, quali maxime populus Dei eget, cum contra infideles arma sunt sumenda, qui non tam armis carnalibus, quam spiritualibus contra eos uti possit, qualem prorsus te esse judicat, a Deo ipso Ecclesiæ datum, qui docuit manus tuas ad prælium, & digitos tuos ad bellum, ut non tam peritia armorum hostes vincere, & delere, quam spiritus potentia, victos salvare, & ad Ecclesiæ corpus adungere, quod Christiano duci maxime est sperandum, omnes merito de te sperent; hac autem spe præter cæteros se maxime frui cum ingenti gratiarum actione horum tantorum in te donorum auctori, qui hanc spem de te excitavit. Deinde quod ad consilia, & exhortationes tuas attinet, primum de adhibenda maxima cura, ut sana doctrina ante omnia in Ecclesia retineatur, & ut interioribus malis primum succurratur, deinde exterioribus; sic quidem Ejus Sanctitas respondebat: Etsi nulli rei magis studere se, quam ut hæc ipsa, & hoc modo fiant, quod summum Dei beneficium agnoscit, qui ante omnia Concilii universalis indicendi voluntatem, & pacis inter Principes procurandæ studium, semper post commissam curam universalis Ecclesiæ maxime infudit; tamen hanc ipsam exhortationem sic gratam esse, ut, quasi Deo per te exhortante, quo enixius laboret, in eo, in

quo unquam nimis magnum studium poni potest, eandem libentissime, & cum summa gratiarum actione audiat, quam videt, quanto ardore spiritus, & caritate in Deum, & Ecclesiam, atque quanta animi sollicitudine scripserit. Qua in re, ut habeas interim, quo te spe etiam magna conso- leris, hunc optimum nuntium de induciis istorum Principum, præter omnium spem, cum maxime inter eos bellum ardere, & repentino Regis Chri- stianissimi in Italiam cum maximis copiis transi- tu, videretur, ut ad te scriberem iussit, atque hoc etiam adscriberem de sua sententia: etsi induciæ appellantur, tamen ea sane se de his induciis scire, ut verius pacis, quam induciarum nomen habere possent. Quare jubere te nunc, ut bono animo esse pergas, de reliquis conforteris in Christo, & sis robustus; habere te nunc, quod maxime in tuis li- teris optabas, pacem Principum, & quietem ar- mis, quam sequuturam sperat eam quietem in re- ligione, quam omnes præcipue desiderare debemus, cujus procuratori, quam nunquam intermisit, se nunc eo enixius operam daturum, quo magis hac porta a Deo aperta per pacem inter Principes, se ad hoc magis invitari agnoscit. Quod vero ad Il- lustrissimos Dominos Venetos attinet, quos præcipue adjuvari ab Ejus Sanctitate in hoc sancto bello op- tas, & deberi adjuvari multis rationibus osten-
dis

dis, sic quidem se paratum esse in omnibus, quæ opus habent, omni auxilii genere illis adesse, ut, quod tu maxime cupis, de bonis Ecclesiæ fieri, hoc constanter Ejus Sanctitas affirmet, non solum se ut amicum, & confœderatum, sed ut patrem filiis cum illis esse conjunctum, & si pater in filii carissimi salute procuranda negligens, aut parcens impensis esse potest, se tamen in iis filiis talem esse non posse, neque ullum patrimonium in Ecclesia, quod ad suum usum, vel aliorum Ecclesiasticorum malit converti, quam Illustrissimorum Dominorum Venetorum usus in tali causa, & tempore. Qua in re illis, quorum maxime interest, abunde satisfacturum promittit. Quæ omnia ut ad te scriberem, in mandatis Sua Sanctitas mihi dedit, cui suam, quam a Christo accepit, benedictionem cum osculo charitatis mittit. Reliqua, quæ pro tempore hic expedire posset, ut de re frumentaria quod postulasti, statim Ejus Sanctitas negotium suis dedit, ut tibi satisfaceret. Hæc autem omnia tibi jucunda esse non dubito, quæ non solum te invitant, ut forti animo in Christi causa milites, sed fortiori etiam, si fieri potest, orationes pro ejus Vicario fundas, ut quam diutissime ad Christi honorem, & Ecclesiæ utilitatem sua consilia dirigentem nobis incolumem servet. Huc adeste PAULI III. laudum obtrectatores omnes,

nes, initoque inter vos consilio, quid ad hæc regerere debeatis, expendite. Una, si me auditis, qua vos expediatis, via superest, affirmando scilicet, fictas tantum fabellas de habito coram Pontifice Conventu illo Polum retulisse, aut, si vera narravit, habitum ipsum fuisse dumtaxat, ut, scenica persona tam a Pontifice, quam a tribus illis Cardinalibus sumpta, ludus oculis eorum omnium, quibus Resp. vere cordi erat, præberetur. Comœdiæ actus pari ratione ab iisdem censendus erit collocutio illa, quam in Epistola ad Polum narrat Contarenus se habuisse cum PAULO III. de negotio ad Curia Romanæ Reformationem spectante: *In via (inquit) compellavit me seorsim Optimus hic Senex Noster, solusque cum solo sermonem instituit de Reformatione Compositionum, & dixit, se detulisse secum, atque legisse antelucanis horis tractatulum quendam, quem conscripsi (de ea re nihil tibi habetenus dixi, quia fere desperaveram, putabamque fore celandum potius, quam prodendum quidquid actum fuerat) plurimaque Christiane mecum disseruit, quo effectum est, ut iterum conceperim magnam spem aliquid Deum boni acturum, neque portas inferi prævalituras esse contra Domini spiritum. Hæc ut quam celerrime scires, cupio, ac Deum ores, ut cœpta a se dirigat, ac perficiat. Fabulam denique (ut cætera omittam) in Gallica*
Ni-

Niciæ Urbe PAULUM Pontificem peregrisse dicent, Actoribus, præter ipsum, Cardinalibus, qui cum eo aderant, pariterque Carolo Cæsare, & Francisco Galliarum Rege.

Niciensẽm Conventum istum convocandum curavit PAULUS III. quo Pontifice nullus certe magis idoneus *hortator pacis, & compositionis publicæ*, ut pluribus eum locis vocat Sadoletus, quod se nullis factionum præmiis contaminari, aut nulla cupiditate extraordinaria transversum agi, neque ferri pateretur, qui patrem se omnibus communem præberet, qui nullas partes dissentientium sequeretur. Eum igitur Carolo Cæsari, & Francisco Regi proposuit, adfuturus & ipse cum iisdem, ut cum utroque de statu Christianæ Reip. colloqueretur. Antequam vero ipse itineri illi se daret, Polus, qui eundem in eo sequi debebat, ferme in procinctu constitutus, alteram ad Camillum Epistolam dedit, in qua de literis ab hoc ad Regem Christianissimum exaratis verba faciens, haud dissimulat se vereri, ut earundem, ceu solis, splendorem ferre possent, qui in tenebrosa valle habitant, ubi sunt domicilia hominum, & Principum hujus mundi, ac proinde ei suadet, ut, ad eos scribendo, stellæ potius lumen, ægris scilicet oculis magis accommodatum, diffundere conaretur, quo illi illustrati, Christum inter animalia pannis involu-

tum

tum aspicere valeant, qui non possunt eum exaltatum contemplari. Id, inquam, postquam Camillo suafisset, Epistolam ita claudit: *Ego quidem harum tabellarius esse maxime cuperem, qua in re eam mihi occasionem Christus præstat, quod Vicarium Christi hoc tempore comitor, qui, ut istis Principibus pacem evangelizet, proficiscitur. Tu ergo interim cogita quid tibi Christus permittat. Hoc vero permetteret, ut ex curru illo tuo igneo ignitam ad Deum orationem pro istis Principibus profundas, ut ad gloriam nominis sui Filii, & ejus Vicarii filios pacis, ad quos est missus, inveniat, & super eos pax Christi, quæ exsuperat omnem sensum, requiescat.* Iter istud PAULI III. quod Deus statutis inter ambos Principes decem annorum induciis fortunavit, nihilominus obrectatoribus ejus Pontificis in invidiam trahere collibitum de more est, atque ad augendam familiam ejus novis ornamentis unice susceptum fuisse criminari. Quare P. Franciscus Courayerus in Opere superius memorato, ad Sarpîi verba ista: *Le prétexte public étoit de rétablir la paix entre ces deux Princes, mais sa fin principale étoit de faire tomber le Duché de Milan dans sa Maison*, nos monet, Jo. Baptistam Adrianum, Historicum coævum, & Onuphrium Panvinium, fidei integræ Scriptorem, Sarpîi suspicionem confirmare, atque ita notam illam

lam suam concludit: *Sur de pareils garants est ce un si grand crime a Fra Paolo d'avoir avancé un tel fait; & croit on qu'un argument negatif, tel que celui que lui oppose Pallavicin, & qui même est convaincu de faux par la deposition des Historiens suffise pour anéantir le poids de ces témoignages?* Pallavicinum Sarpîi narrationi nil aliud quam argumentum inficiale opposuisse, impudentissime a Courayero affirmari, nemo inficietur, qui Pallavicinum adeat, ubi agit de Pauli itinere illo, scilicet lib.IV.cap.6. Ait quidem iste, nihil in ejus temporis reconditioribus memoriis se reperisse, quod vel unica linea cupiditatem potiundi Ducatus Mediolanensis, qua Pontifex arderet, significet; at insuper Nicolai Theupoli, Veneti ad Conventum illum Oratoris, Relationem de eodem laudat, & plura ex ea depromit, aperte comprobantia sinceram, paternam, & Christianam Pontificis curam in pacis inter eos Principes negotio curando, cujus gratia, & itineris illius incommoda, & mansionis in Cœnobio prope Nicæam angustias valetudinariis, & longævus senex tolerare coactus fuerit; hæc, inquam, omnia quum Courayerus in Pallavicini Historia legisset, valde admirandum est, non aliam ipsis inesse vim censuisse, quam quæ ex argumento inficali proficisceretur. Hæc ego attuli adversus Courayerum in Diatriba altera, & ibi

pariter eidem opposui celebratissimi Historiæ Venetæ Scriptoris, Andreae Mauroceni, auctoritatem, de qua altum silentium apud Sarpium, & Courayerum, imo & apud ipsum Pallavicinum. Nihil tamen disertius ad demonstrandam animi Pontificis in eo Conventu optimam propensionem, ad publicum scilicet bonum spectantem, quam verba a Mauroceno usurpata, *PAULUS Pontifex vel suo pte ingenio, vel Pontificio munere totus in Remp. Christianam incensus erat*, & illa etiam, *Pontifex interim adhortationibus modo hunc, modo illum orare* (utrumque scilicet Principem) *suadere, ne privatarum rerum rationibus periclitatem Christianam Remp. proderent*; atque alia præterea plura, quæ legi possunt in ea Mauroceni narratione. Non dissimulat quidem Historicus iste, in eo Conventu magnum certe domesticis rebus ejusdem incrementum, ac decus accessisse, Novaria urbe Petro Aloysio Farnesio dono data a Cæsare, hujusque filia Octavio Farnesio desponsa; at subdit, id factum a Cæsare, quod hac ratione res Italicas confirmaturum se arbitraretur.

Memoratus in postremis istis Mauroceni verbis nuptiarum inter Octavium PAULI III. Nepotem, & Margheritam Caroli Cæsaris filiam, contractus me monet, ut præstitam in Cap. II. fidem modo liberem, ostendens scilicet, easdem non infestis

flis oculis, quod passim fit, contuendas esse, sed quibus enatam ex illis sobolem aspexisse comperitur Sadoletus. Quos iste de hac protulit sensus, ad PAULUM III. scribens, eo libentius repræsentabo, quod validi umbonis instar sint ad ictus omnes repellendos, quibus Sanctissimi Pontificis memoriam ob genus suum, summorum Principum prærogativis decoratum, impetere in more habent homines bene multi, seu ex malevolentia, qua aditus omnes sibi parant ad infuscanda Romanorum Pontificum splendida quævis gesta, seu etiam ex religionis quidem zelo, sed cum quadam iudicii asperitate conjuncto, quam certe sectari vix licere reor, ubi sanctissimorum, consultissimorumque veteris ætatis Catonum placitis, atque auctoritati refragetur. Hujusmodi habendum esse Sadoletum nemo profecto in dubium revocabit. Hic igitur in Epistola ad PAULUM Pontificem ita loquitur: *Cum multa sint indicia divinæ erga Sanctitatem Tuam beneficentiæ, summæque liberalitatis, tum nullum est præstantius, quam quod eodem dono nunc Deus propagationem familiæ Tuæ, & publicam pacem ac tranquillitatem est complexus. Geminis enim pronepotibus ex summi Imperatoris filia, & nepote Tuo in lucem nobis editis, addidit ille quidem decus generi, ornamentum familiæ, subsidium nomini, cujus recens hic partus perpetuitatem*

tem quandam denuntiat: sed in tanto privato S.T. commodo, illa etiam major in ipsius animo lætitia insidet, quod omnibus jam suspicionibus penitus elisis, quæ nos sollicitos aliquandiu habuerunt, communi Italiæ paci & otio a Deo est consultum. Duorum enim maximorum Principum sanguine in unum genus, unamque prolem derivato, atque conflato, animos quoque eorundem in unum sensum confluere necesse est. Qui sensus, si T. S. consilia valebunt, sicut certe valitura sunt, ad tranquillitatem publicam, ad quietem Italiæ, ad conservationem pacis, cujus ipsa tutrix semper fuit, sine dubio spectabit. Hoc ipsum argumentum pluribus postea prosequitur, eo semper spectans, ut privatum illud Pontificis gaudium cum publicis utilitatibus arcto vinculo connexum esse demonstret. Etenim (inquit) habet obsides jam Resp. duos duorum præstantissimorum Principum liberos, qui utramque nobilitatem in unum genus jungunt, qui spondent, pollicenturque nobis omnibus immotam pacem, securum otium, animorum concordiam Romæ, & in Italia fore: quibus muneribus nullum nobis a Deo, in hoc præsertim tempore, accidere potest optatius. Ad hos Sadoleti sensus respiciant, pervelim, iusti rerum æstimatores, indeque nefas putent in iudicando de PAULI III. gestis ab eo modo recedere, quem, nunquam satis laudati, religionis Antistites olim tenuisse dignoscuntur.

Su.

Supereſt, ut de PAULI III. itineribus ob publicas cauſas ſuſceptis aliquid dicamus; quam ad rem aptiſſimi erunt unus & alter locus, qui in quinta Ludovici Senſi Concione, ſuperius memorata leguntur. *Hunc (inquit) cernimus, ut in gratiam eos (Principes) reducat, omnia tentare, omnia moliri, in omnia ſe ſe vertere, non ſumptibus, non laboribus, non ſuæ denique vitæ parcere. Quot itinera jam ſex & ſeptuaginta annos natus confecit? Quot ob eam ipſam cauſam confecere Nepotes ſui? Quot terrarum tractus per imbres, per æſtus, per frigora emenſus eſt?... tantum ut aliquem diſcordiis finem ſtatuat, & gregem creditum a ſæviſſimorum hoſtium armis ſecurum reddat. Poſtea dolens quorundam Pontificum morem, ac vitæ rationem, qui Romæ fere deſidentes, quæ a ſubjectis populis agerentur nonniſi per Miniſtrorum literas cognoſcebant, unde graviſſima incommoda ferre, cogerentur omnes provinciæ, ita ſubdit: At Divus PAULUS III. (inquit) memor ſe a Deo Maximum Episcopum conſtitutum, quæ vox Græca ſpeculantem, ac viſitantem ſonat, ut fideliter munus comiſſum expleat, ſingulas civitates, & ſingula prope-modum caſtella, ſingulos vicos ſemel, & cum uſus poſtulat, iterum, ſæpiuſque viſens, nunquam ſe ſiſtit. Felices populos, quibus huiusmodi Principes imperitant!*

CA-

CAPUT V.

*De PAULI III. industria in S. R. E. Cardinalium delectu,
& in adhibendis inter ipsos ætate, ac virtute provectio-
ribus ad Legationes ultramontes pro gravissimis
Ecclesie negotiis.*

Nihil in utraque Diatriba mea frequentius oc-
currit, quam occasio divinam PAULI III. sa-
pientiam ad cœlum tollendi ob Viros doctrinæ, &
morum ornamentis florentissimos, quos, evocatos,
rogatos, in amplissimum Cardinalium Ordinem ex
omnibus orbis terrarum locis adscivit. Hæc profe-
cto una res est, quæ, etsi reliqua omnia ad com-
mendationem ejus Pontificis defuissent (ea tamen
abundarunt) satis per se demonstraret, nihil ei-
dem antiquius fuisse, quam in veterem suam di-
gnitatem Romanam Ecclesiam tristissimis tempo-
ribus vindicare; eo enim dumtaxat egregium ejus-
dem in iis cooptationibus studium collimare po-
tuisse, nemo prorsus erit, qui in dubium valeat
revocare. Hujusmodi laudem abunde propterea
in PAULUM III. contulisse comperimus ejus ætatis
Scriptores plerosque omnes, una fere voce testan-
tes, nihil factum fuisse post hominum memoriam
vel ad gloriam Pontificum illustrius, vel ad reli-
gionem ex tot incommodis revocandam aptius, ac
sa-

fapientius , vel ad augendam Collegii Cardinalium dignitatem opportunius, quam quod Comitibus illis, præstantissimi homines, & ipsi, quandoque ad novum prorsus vivendi genus translati, firmandæ, ac constituendæ Christianæ Reip. præficerentur. Quare nemo miretur, me ingenue fateri, in pertractanda prima hujus Capituli parte, inopem quodammodo, ut dici solet, ab ipsa copia factum esse, eorum Scriptorum testimoniis adeo multis, adeo certatim se mihi offerentibus, ut ancipitem animum meum redderent ad dignoscendum, quænam ex ipsis expediret hoc loco recensere, & quænam prætermittere. At tandem id consilii cepi, ut unum tantum ex prima Diatriba, & æque unum ex altera huc afferrem testem. Id tamen antequam exsequar, sua laude minime fraudandum reor Gasparem Contarenum, quod ejus præsertim auxilio, & studio egregium illud PAULI III. facinus debeat. Propterea Cosinus Gherius, sanctissimus ille Fanensium Episcopus, Epistola, quæ extat inter illas Claror. Viror. eundem Contarenum his verbis alloquitur: *Universam Ecclesiam majorem in modum tibi devinxisti, eique justissimam lætitiæ causam attulisti: quis enim recte sentiens, ex Theatini, Sadoleti, Poli summa dignitate summe non lætetur? Ego vero non dubitabam, neque dubitari intelligebam, quin tuo maxime auxilio, ac studio, florentissimi, ac sanctissimi æta-*
-idi tis

tis nostræ homines in amplissimum Collegium cooptati essent. Quamobrem gratulor tibi primum, quod ex Cardinalatus tui quasi semente, eam Cardinalium tui similium frugem Deus colligere velle videatur &c. Insigne autem operæ illius argumentum nobis exhibet ejusdem Vita a Ludovico Beccatello, Præsule Bononiensi, Italico idiomate conscripta, & inter Codices MSS. Vaticanos adservata. In ea enim ita scriptum reperio: *D'aver usato spesso volte di dire a S. Santità il Cardinale Contarini, che se S. Sant. voleva far bella la Chiesa, non accadeva più scriver leggi, che assai già ne erano fatte, ma che facesse dei libri vivi, i quali quelle leggi facessero parlare, e render frutto, & questo era fare Cardinali, & Vescovi, che havessero il timore di Dio, & fossero dotti.* Monitum hoc præclarissimum, ac saluberrimum, quod Præsul ille, Apostolicæ Sedis administer (nam Venetam Legationem obivit) literis mandandum ad posteritatis memoriam putavit, quisnam erit qui dignissimum non putet, quod in auro cæletur una cum aliis sacri illius Cætonis, quo nomine Contarenum a Pallavicino insignitum vidimus, sapientissimis dictis?

Testis modo afferendus ex prima Diatriba, Joannes Casa, Archiepiscopus Beneventanus, Pontificius & ipse in Venetiarum Urbe Legatus. Hic in ejusdem Contareni Vita, quam Latine exaravit, agens
ibi-

ibidem de illo ad Cardinalatum evecto, hæc habet: *Non eadem conditione est Collegium Cardinalium, ceterarumque civitatum senatus, aut consilium: nam illæ ex ea, quam habent, civium copia in suos senatus, qui aptissimi visi sint, legunt; in Collegium Cardinalium e toto Orbe terrarum, qui aut doctrina, aut nobilitate, aut prudentia, aut probitate, religione, pietate excellunt, si Pontifici Maximo visum sit, eos cooptare licet; eoque factum est, ut summa is Ordo amplitudine, summa auctoritate, summo splendore, omni ille quidem tempore fuerit, quippe e Christianorum flore decerptus, atque collectus. Verumtamen iis, de quibus institutus mihi sermo est, temporibus, præcipuum quoddam in eo lumen enituit; propterea quod PAULUS Pontif. Max. magni, atque acris iudicii Vir, eximia, singularique virtute homines naetus, ad eam illos dignitatem ultro ipse evocaverat, ut ei Collegio, quod per se antea esset clarissimum, ea re lucis tamen permultum attulisse videretur. Idem Casa novum de eadem re testimonium profert in Vita Petri Bembi, ubi ita loquitur: PAULUS III. simul ac Pontifex Maximus factus est, extemplo tanto imperio ac potestate accepta, ut initium rerum, actionumque suarum ab illustri aliqua laude duceret, faciendum sibi esse existimavit, ut, qui quaque in civitate, quibusque in ter-*

ris homines essent, illustri quadam aut pietatis, aut prudentiæ, aut doctrinæ laude celebrati, illos ultro ipse, eam dignitatem haudquaquam petentes, ac ne tale quidem quicquam suspicatos, amplissimum in Cardinalium Collegium cooptaret; ea resperabat, cum Pontificatus Collegiique, tot clarissimorum hominum accessione facta, auctum iri majestatem, tum specimen se quoque suæ virtutis maximum cum dedisset, magnam de se famam, opinionemque esse facturum. Itaque semel atque iterum magna cura, magna adhibita diligentia, summos viros pervestigavit, atque delegit; quibus gravissimam illam dignitatem, nimio a plerisque opere sæpe frustra ac nequicquam expetitam, ultro mandaret; quo facto, opinione majorem est gloriam consequutus.

Locum autem ex altera Diatriba recitandum, placet, depromere ex Petri Aretini ad PAULUM III. Epistola, nam laudem, quam in Cardinalium delectu sibi PAULUS III. conciliavit, ea probat, adeo indubiam, adeo perspicuam fuisse, ut vel pravissimæ linguæ homo adactus fuerit ipsam pleniori suffragio prosequi, & confirmare. Ex Petro Bembo sacra Purpura donato occasionem capit Aretinus PAULO III. in Epistola ad eum scripta delectum illum his verbis gratulandi: *Gli altri Pastori creano Cardinali Reverendissimi, & voi create Vicari*
di

di Christo, e ciò verificherebbe il lungo andare, caso che vivessero secondo il dovere delle virtù loro, & il bisogno della fede nostra. Veramente si come essi non potevano nascere in tempo più opportuno, ne a i giorni di miglior Papa; così voi non potevate dispensare le dignità sacrosante in più necessaria occasione, ne in più giuste creature, & è chiaro, che l'heresia gravida del seme sparto dalla malitia Lutberana, o che disperderà il concilio, e che le dottrine di tali lo annullaranno, partorendolo. Intanto Italia, Spagna, e Francia, da che havete saputo fare del Collegio di Pietro il Bembo, &c. Quotquot igitur PAULI III. gesta invidia onerare contendunt, noverint, eam sibi ipsis laudem adsciscere, ut longo intervallo malignitatem hominis, cujus lingua parem in nocendo certe non habuit, quique propterea Principum flagelli proprium veluti nomen sibi promeruit, exsuperare comperiantur.

Paucis hisce de prima hujus Capitis parte in medium allatis, progredior modo ad ea, quæ pars altera ejusdem deposcit. Ultramontanas Legationes pro gravissimis Catholicæ religionis negotiis pensum fuisse, quo non aliud frequentius PAULUS III. Cardinalibus eximia doctrina præditis imponere in more haberet, facile quivis intelligat ex demandato eo munere semel, iterumque intra triennium Cardinali Polo, ut fidem faciunt quam-

plures hujus Epistolæ, in altero Collectionis nostræ Volumine exhibitæ; quæ præterea probant, Polum Reip. juvandæ ardore incensum parvifecisse longorum itinerum incommoda omnia, ab ipso molestioribus præsertim anni tempestatibus devoranda. Belgicam Legationem obiturus Roma excessit ineunte mense Februario an. 1537. primisque itineris diebus, quo affectus fuerit incommodo, enarrat ipsemet in Epistola ad Contarenum, Bononiæ data, postremo ejus mensis die: *Negare non possum, me primis illis diebus, quibus iter sum ingressus, valde afflictum fuisse, quod prope necesse fuit, vel propter subitam illam mutationem a summo otio, & quiete ad laborem, & negotia, vel propter repentinam etiam una cum labore mutationem victus, & ejus generis, quod laborantibus non ita salubre est, deinde ventos, & apertum cælum, cui me ab aliquot mensibus non assuefeceram: quæ mihi primum distillationes e capite assiduas, quæ pectus etiam occupabant, moverunt, non sine febre, quam maxime nocte sentiebam; tamen sic nunc his omnibus sum liberatus, ut jam mihi robustus videar ad omnes labores itineris suscipiendos, cui me nunc maxime præparo. Sed neque propter superiores difficultates ullam diem intermisi, postquam Roma discessi, in quo non aliquantum viæ, & quantum per equos licebat,*

*bat, confecerim. Hispana autem Legatio Polo in-
unda fuit desinente mense Decembri an. 1538. &
quamnam, iter illud ingrediens, tam viarum, quam
temporis asperitatem expertus fuerit, certio-
rem ipse facit eundem Contarenum Epistola, quam ad
ipsum dedit Bononiæ in festo Epiphaniæ, eam his
verbis exorsus: Quantum (inquit) per asperitatem
viarum licuit, & tempus omnium asperrimum
propter maxima frigora, & altissimas nives, qui-
buscum perpetuo a mansione primæ noctis in hunc
usque diem per totam viam lustrari oportuit, nihil
prorsus de celeritate conficiendi itineris est omis-
sum, neque ullo unquam die penitus ab equitatio-
ne est cessatum. Quod ut facere possemus, perpe-
tua serenitas temporis, quæ nos in hanc usque Ur-
bem est comitata, adiuvit, quæ, si vel in pluviam,
vel in nivem se commutasset, non solum difficilem
Apennini transitum, sed prorsus ad aliquot dies
propter altitudinem nivium insuperabilem reddi-
disset. Subdit tamen: Et si nullo unquam tempore
passus sum tantam vim frigoris, quod tantopere
corpus afficeret, quantum hoc tempore in Apenni-
no, tamen nihil inde me magis invalidum factum
ad labores ferendos sentio, adeo ut si iter, & pro-
pter anni tempus, difficultatem viarum, & longi-
tudinem multo difficillimum restet, tamen ut spe-
ro, iter durum vincet pietas, quam spem meam*

au-

augent cum orationes multorum bonorum Virorum (quos scio in hoc officio mihi non defuturos) ut ab eo qui solus debiles fortes facit, idem pro me precibus impetrent, tum maxime Rmæ D. V. cui me perpetuo commendo.

Atque hæc quidem satis erunt ad præbendum specimen ejus industriæ, quam PAULUS III. navabat in Cardinalibus, præsertim a se delectis, ad laboriosas Legationes adhibendis. Celebriores profecto inter ipsas fuerunt, quas aliquo tempore post Poli illas gesserunt Contarenus, Cervinus, Alexander, Sadoletus, Moronus, & quam multo serius in Anglia ipse Polus obivit. Attamen iis omissis, aliquid tantum dicam de binis Legationibus, & maxime operosis, quas Alexandro Cardinali Farnesio, octodecim tantum annos nato, intra quinquennium Opusculo isti meo præfinitum, commisit Sanctissimus ejus Avus, in Hispaniam nimirum, & Belgium, *parum admodum præ Reip. caritate sollicitus* (ait Sensus in sæpe laudata Concione) *quod corpus illud adolescens, tenerumque adhuc, immensa ea jactatione, cui sæpe durati laboribus non sufficiunt, labascere facile potuisset.* Legationem Hispaniensem Cardinalis Alexander suscepit dimidio anno 1539. Romamque post tres menses redux, eodem iterum munere functus est in Belgio ad Carolum Cæsarem, & in Gallia ad Franciscum Regem. De illa loquitur Bem-

Bembus in Epistola Famil. lib. 6. qua eidem gratulatur reditum ad suos non solum vegeto corpore, sed etiam hilariori vultu, quam discesserat, etsi eadem maximis anni caloribus, mutatis jumentis, functus fuisset. Ad eam ipsam refertur Flaminii Carmen, ex quo plures versus Cap. II. recitavi, & cujus initium,

Dum puer aerias superat Farnesius Alpes,

Et permutato currit anbelus equo &c.

Utramque vero complectuntur hi ejusdem versus:

Ades Quiritum

Alexander ocelle. Sat tulisti

Dura frigora, sat graves calores,

Et casus varios periculorum.

Te vidit Tagus aurifer citatis

Equis currere, te rapacis unda

Rheni, te Liger, & Garumna vidit

Iratos properantem adire Reges,

Et componere bella, foederumque

Leges dicere.

Tandem adnotabo, tanti ea ætate fieri consuevisse hujusmodi Legationes, in quibus Cardinales doctrina, & moribus præstantes exercebantur, ut præ strenua illa Reip. administratione, quotquot negotia a reliquis, qui Romæ interea subsisterent, gererentur, non alio passim quam otii nomine nuncupari consueverint. Urbanas occupationes nemini forte

forte ex proveſtioribus Cardinalibus PAULUS Pontifex copioſius defererebat, quam Contareno; eas tamen laboris vacuas reputaſſe viſus eſt Polus, dum cupiens ad reſtituendam in Germania rem religionis admodum proclinatam eundem ablegari, ita ipſi ſcribit: *In hac vero Germaniæ cauſa nunquam amor meus erga te, quem ſcio ſuum otium libenter amplecti, tantum apud me poterit, ut non multo magis pro mea erga Eccleſiam pietate optem, ut tu ad illud negotium te dignum, & idoneum maxime extrudaris.* At una ſimul adnotabo, otium, de quo hic loquitur Polus, tam Contarenum, quam eximios alios Cardinales, conſcribendis ad Catholicæ cauſæ præſidium lucubrationibus inſumere ſolitos fuiſſe, quos frigido acuminis genere Sfortia Pallavicinus dixiſſet, ut de Cardinali Guidone Bentivoleo ſcripſit, *aver' illustrato la Porpora con l' inchiostro.* Quam magno autem in pretio eoſdem PAULUS Pontifex haberet, & præter ipſum, Senatus univerſus Apoſtolicus, documentum, eſſi in re tenui, ſatis apertum attuli in Diatriba mea altera ex Sadoleti ad Polum Epistoſa, quæ memorat humanitatis officium illi præſtitum a Collegis, & Contareno præſertim, dum pecunia, degentibus Romæ Cardinalibus attributa, extra Italiam morantem liberaliter donarunt, quod, licet abſens, Scriptis ſuis de Romana Sede bene, & inſigniter mereretur.

CA-

CAPUT VI.

De PAULI III. benignitate in excipiendis S. R. E.

Cardinalium seu precibus, seu consiliis.

LAUDEM, quam profecto singularem Capite proxime superiori comparasse sibi vidimus PAULUM III. in S. R. E. Cardinalium delectu, non alia ille ratione cumulationem efficere valuit, quam si reipsa comprobaret, eosdem in Christiana Rep. sapienter administranda utiles admodum adiutores sibi fuisse; quod certe palam declaravit ea facilitas, ea benignitas, quam hoc Capite collaudandam suscipio. Statim autem dico ejusdem patefaciendæ adiutum PAULO patuisse in eo ipso delectu, quem scilicet nonnisi antiquiorum, & sapientiorum Cardinalium seu precibus, seu consiliis fieri ab ipso plerumque consuevisse, plura ejus temporis monumenta contestantur. Inter Sadoleti Epistolas extant nonnullæ ad eum Pontificem datæ, quibus unicum argumentum præbent illius obsecrationes pro hominibus optime meritis ad eam dignitatem evehendis. Eos ibi diserte nominat, atque commendat, præfatus tamen, se haud latere, objici sibi posse nimiam quandam audaciam, vel temeritatem, qui tantis de rebus cum maximo & suo, & omnium Princi-

M

pe,

pe, tam familiariter, & libere agat, cum Principe, cujus acre ingenium, summum acumen, admirabilem perspicaciam, nihil sit omnino quod fugiat, *Sed in hoc (inquit) illa summa, & prope incredibilis humanitas tua me consolatur.* Paucos tantum ante menses quum Purpuram Sadoletus accepisset, nulla interposita mora, nullisque usus circuitionibus, aperte, ut veritas ipsa, & fides sua ferebat, his verbis Pontificem affatus est: *Incredibile est, Pater sancte, quantum dolorem acceperim, quod summus, & doctissimus vir Hieronymus Aleander, Brundusinus Archiepiscopus, ab eo honore exciderit, ad quem ego vocatus sum: quo adjutore, & socio, ambobusque nobis, ut etiam apud Homerum est, studio locoque conjunctis, alacris animo eram, planeque Deo fretus, confidebam, nos non modo apertos impetus hostium, sed absconditas etiam insidias facile propulsaturos. Multa enim collecta sunt in eo homine magna, atque præstantia, quæ in ceteris singula vix insunt, eaque omnia maxime & huic tempori, & huic causæ necessaria.* Eximias Aleandri dotes postea recenset, nimirum linguarum summam cognitionem, Conciliorum, rerumque, quæ ad eam rem pertineant, omnium memoriam, scientiamque admirabilem, usum, atque consuetudinem cum exteris nationibus, ac cum Germanica præsertim, in
qua

qua diu, acriter, & feliciter negotia Catholicæ fidei tractavit; ac mox subdit, *Quo ergo tantum bonum a nobis rejectum est?* Et post pauca, *Doleo igitur, & vebementer doleo, quod Aleandrum comitem mihi fortuna inviderit. Nam cum in me aliquid fortasse insit, quanquam exiguum id & tenue, attamen publicæ causæ non inopportunum, id illo comite & adjutore amplius, & valentius certe erat futurum. Omnino semper consilium tuum sapiens, nihilque nisi summa ratione abs Te agi solet: mihi tamen & dolere, & timere necesse est, quod vereor, ne sit non levis plaga publicæ causæ injecta.* Tandem Deum testatur inspectorem cordium, se hoc testimonium de illo Viro neque gratiæ dare, neque ulli cupiditati suæ, sed unam sibi veritatem, unam utilitatem publicam, unam rationem honoris & nominis, quod sibi eximium, & memorabile Sanctitas Sua pepererat, esse propositam. Quibus precibus exoratus Pontifex, nihil moratus est ad Aleandrum inter Cardinales cooptandum. Quare nil mirum, si paulo post, quum idem, pluribus Cardinalibus renunciatis, unum adhuc Venetum legendum sibi reservasset, aliis literis a Sadoletto obsecratus deprehenditur, ut locum illum contraderet Petro Bembo, clarissimo Viro, & omni virtute, doctrina, eloquentiaque ornatissimo; qua re præstita, *non tam*

*quidem (inquit) sibi novam comparare gloriam
præclari sui in hominibus deligendis iudicii ,
quam veterem , & jam partem confirmare , eo-
rum omnium iudicio Sanctitas Sua censeretur ,
qui in toto orbe terrarum coniectos in hanc ip-
sam oculos haberent . Dedit has literas Sadoletus
Nonis Januar. 1539. binisque dumtaxat mensibus
cum dimidio elapsis , novo ipsemet experimento
comperit , humanissime PAULUM III. suis illis pre-
cibus annuisse . Tertiis igitur literis eundem Pon-
tificem paribus votis precari sibi fas esse putavit ,
dum scilicet fama nunciaret , quam primum sup-
pletum iri Ordinem , in quem adlegere solita fo-
ret Sanctitas Sua optimos, ac doctissimos homines,
ac de iis ita loquitur : *Atque hi soli omnino sunt ,
qui fidem præstant suam honoris sui auctoribus ;
quique eos & in ipsis , & in posteritate eorum ,
semper salvos , honestos , florentesque esse cupiunt :
ceteris (ut Sanctitas Tua animadvertere sæpe po-
tuit) qui non ex virtute , sed ex ambitione lecti sint ,
studia , & actiones suas , non officio aut honestatis
decore , sed emolumentum compendio fere dirigenti-
bus . Quem autem iis literis Pontifici nominavit ,
is fuit Gregorius Cortesius , Abbas Benedictinus ,
quem in hunc modum commendat : Nemo est pro-
fecto qui nesciat , quæcunque in magno , & bono sa-
cerdote postulanda sint , omnia in eo excellenter*
in-*

inesse, ingenium, consilium, eloquentiam, doctrinam, & quæ his quoque laudabiliora sunt, quoniam Christianis moribus sunt propria, pietatem præterea, continentiam, religionem. Et huic Sadoleti voluntati suam rectissimam, ac benignissimam accommodare Pontifex minime renuens, Cortesio in ea, quæ proxime subsecuta est, Cardinalium cooptatione honorem illum volens, libensque mandavit; eundemque haud multo post mandasse insuper comperitur Hieronymo Capoferreo, Nicensium Episcopo, & Thomæ Campegio, Episcopo Feltrensi, quos ambos amplo testimonio idem Sadoletus exornaverat in literis ad eundem Pontificem, in quibus ita scribit: Cum ergo proximis Cardinalium comitiis, quæ instare jam jamque, & prope adesse sermonibus hominum circumfertur, sit Sanctitati Tuæ locus, suam, quemadmodum consuevit, liberalitatem, & beneficentiam in benemeritos exercendi, putavi ad meam fidem atque officium pertinere, duos Tibi commendare, quos Tibi ipsi non dubito esse probatissimos. Quod equidem facio, non illorum precibus efflagitatus, absunt enim ambo a me longe gentium, meæque hujus cogitationis penitus ignari sunt; sed hoc officium atque operam, virtuti, & veritati, & amicitiae sponte tribuens.

Neque vero in hujusmodi tantum officiis Cardinalium preces, & monita benigne PAULUS III. *ex-*

ci-

cipiebat, sed & in aliis, quæ libere exposita vix fieri posse videretur, quin a Pontifice cum aliqua animi offensione acciperentur. Exemplum afferam ex eodem Sadoletto acerbè conquerente de gratiis, privilegiis, concessionibusque, quibus, PAULO III. Pontifice, gaudebant Judæi, *Agam fortiter* (ait ipse ad Cardinalem Alexandrum Farnesium scribens) *utarque libertate, quam tribuit mihi Deus: neque eum Principem, cui omnia debeo, cujus eximiam laudem virtutis, probitatis, sapientiæ, ullis hominum sermonibus infringi, aut imminui iniquissimo animo patior, falsis assentationibus in errorem inducam. Sed dicam aperte, ut se res habet. Qui potest videri amore religionis in suis provinciis Lutheranos persequi, qui in eisdem provinciis tantopere sustinet Judæos? Sustinet autem? Imo vero auget, condecorat, honestat? Quam valde facerent ea privilegia ad evertendos Christianos, postea exponit, quod quum fecisset, ita subdit: *Hæc vos tandem quomodo ab his trans alpes nationibus accipi existimatis, quarum in oculis, & in conspectu posita sunt? Quæ nationes carent omnes hac Judæorum peste, nec abominantur pejus quicquam, quam Judæorum nomen, quos tantopere vident istic in deliciis esse. In tantane defectione animorum omnium jam a nobis gentium (plane enim dico omnium, quod ego ita esse intelligo, vos haud ita*
sen-*

sentitis, propterea quod auribus vestris vulgo homines blandiuntur) in tantane, inquam, defectione omnium, & prope execratione auctoritatis ecclesiasticæ, magno Reipublicæ præsidio futurum putatis, si sic alueritis, sic extuleritis Judæos? fideles autem, & pauperes populos vestros sic lacerrari ab illis, & diripi neglexeritis? Porro in hæc loca (quod Tu transiens nosse potuisti) provinciæ maxime concurrunt, Italia, Hispania, Gallia, atque Anglia, e quibus qui hac iter faciunt homines, conscios eos esse hujusmodi querelarum, easque domum ad suos referre, sane existimationi vestræ, & communi saluti non expedit. Æque dolenter, æque libere, æque fortiter alias de eodem argumento literas Sadoletus exaravit alteri Pontificis nepoti, videlicet Guidoni Ascanio Sfortiæ. Sed quæ datæ extant ad utrumque ab eodem literæ, fidem faciunt, ea omnia a Pontifice, eorundem præsertim nepotum interventu, in meliorem partem ita accepta fuisse, ut simus (inquit ad Alexandrum Card. scribens) omnia quæ voluimus, quæ ad horum fidelium populorum fortunas ac salutem potius, adversus Judæorum improbitatem, ac fraudes tuendam, pertinebant, ipsius non solum æquitate, & iustitia, sed summa etiam clementia & benignitate consecuti,


At non unius dumtaxat Sadoleti liberas voces per-

perhumaniter passus est Paulus Pontifex. Æque huic acceptam fuisse parem Contareni ingenuitatem nobis demonstrant tradita ab isto in binis Epistolis, quibus de potestate Pontificis in usu Clavium, & compositionibus agit. Primæ postrema afferam verba, quæ hujusmodi sunt: *Nescio quidnam fiat in compositionibus. Sed si ita fit, ut supra diximus, corrigendum est, vel, si non corrigitur, saltem non est fædanda hujus S. R. E. doctrina hujusmodi positionibus obliquis. Si mores sunt quopiam pacto obliqui, doctrina tamen perseveret recta, neque veritatem Dei nostris moribus, & consuetudinibus accommodare velimus. Pater Sanctissime, ingressus es viam Christi, audacter age. Neque magno isto tuo animo ullo pacto verearis, si ob correctionem hujus rei desint Tibi ob distractionem bonorum Ecclesiæ factam a tuis prædecessoribus viginti, aut triginta millia nummorum aureorum ad sustinendam vitam Pontificis. Quin facillime multis modis resarcire hæc possis cum immortalis tua, tuorumque omnium laude, ac sempiterna memoria. Universa Christiana Resp. summum gaudium capiet, Te venerabitur, ut Deum alterum; nullumque Pontificum post Beatissimum Petrum Tibi præferendum ducent & nostræ ætatis homines, & universa posteritas. Hoc castigato, quod ad Te pertinet, cætera omnia erunt facillima. Deus potest*

test diriget gressus tuos, & tuorum omnium. Familiæ tuæ protector erit, & super omnia bona sua, constituet Te, ut ipse in Evangelio pollicetur servo fideli, quem constituit super familiam suam. Dominus diu nobis servet Sanctitatem Tuam incolumem. In altera totus est Contarenius in redarguenda Juris peritorum quorundam sententia, Qui nimio quodam affectu ducti quidam juris periti student hanc Pontificis auctoritatem amplificare; adeo ut eorum quidam non vereantur dicere, voluntatem Pontificis regulam quamdam esse, qua ejus actiones dirigantur; neque in jure positivo constituendo, aut abrogando, aut etiam dispensando regulam quampiam Pontifici constituendam esse, præter ejus voluntatem, adeo ut omne hujusmodi jus arbitrarium esse persuadere nobis voluerint. Quare subdit: Id circo, Pater Sanctissime, cum sim vocatus in partem sollicitudinis publicæ, debeamque pro virili Majestatem bujus Sanctissimæ Sedis tueri, decrevi paucis complecti ea, quæ mihi videntur facere ad horum errorem manifestandum. Claudit autem Epistolam his verbis: Ut paucis ergo totam hanc rem claudamus. Habes, Beatissime Pater, summam a Christo potestatem in gubernando Christiano populo. Hæc potentia rationis est. Det operam Sanctitas Tua, ut habeat summam illam, quantum fieri potest, potentiam

N

&



Et libertatem voluntatis, ut scilicet per divinam gratiam, tuumque nixum, non recedas a regula, ut supra diximus, neque Te vertas ad impotentiam voluntatis, quæ malum eligit, Et ad servitutem, quæ servit peccato. Hæc etenim libertas, hæc potentia voluntatis, cum conjuncta fuerit potestati Pontificiæ a Christo Tibi traditæ, tunc eris potentissimus, tunc maxime liber, Et totius Reip. Christianæ vita, Et sic Te moderante, Et gubernante cœleste quoddam in terris vivendi genus exprimet.

PAULI III. in excipiendis Contareni hujuscemodi monitis benignitatem singularem dignoscimus ex ejusdem Contareni ad Polum Epistola, ex Ostiis Tiberinis data, unde innotescit, Pontificem in via, dum per mediam quandam planitiem ambularet, seorsum Contarenum compellasse, & solum cum solo de reformatione Compositionum sermonem instituisse. *Et dixit (en ejus Epistolæ verba) se detulisse secum, atque legisse antelucanis horis tractatulum quendam, quem conscripsi, plurimaque Christiane mecum differuit.* Contareni monitum de cura a Pontifice suscipienda potius in sanctis, doctisque Episcopis, & Cardinalibus eligendis, quam in novis legibus condendis memoravimus Cap. proxime superiori, quod apertissime demonstrat, Contareno id valde sapienter suadenti Pontificem sapientissime auscultasse.

Tan-

Tandem, quemadmodum Poli etiam consiliis faciles aures præbere PAULUS Pontifex in more haberet, declarant pleræque eæ omnes literæ, quibus suarum Legationum eventa ille describit, nam fidem faciunt, non alia in iisdem, etsi de gravissimis rebus ageretur, Pontificem statuere solitum fuisse, quam quæ ipsius Poli bona mens, atque religio facienda censuissent. Quam necessarium autem Polus existimaret, ut in consiliis dandis non prudentiæ lenocinio Cardinales ducerentur, sed Dei tantum causam spectarent, palam ipse edocuit, hæc de Contareno scribens in Epistola ad Priolum: *Sed quid Contareno hac in causa cum prudentiæ partibus? Non deerunt alii, qui has partes agant. Hæc vero non sunt tali tempore partes ejus. Dominus est pars ejus. Agant alii prudentiæ partes, agat ille suam, & cum Cæsar utrasque audierit, tum faciat quod sibi in mentem Deus immiserit.*

Atque hic finem facio meæ isti lucubrationi, certo mihi persuadens, non alia magis ratione declarare potuisse PAULUM III. sincera a se fide omnem industriam collocatam fuisse in adhibenda Ecclesiæ morbis medicina, quam si artis hujus antistites, quos sibi maximo jam studio undique paraverat, secum libere & fortiter agere pateretur in eum modum, quem postremo hoc Capite descripsi. Fidem, justitiam, & religionem in iis primum

ad dignitates evehendis, deinde in excipiendis eorundem seu precibus, seu consiliis, seu monitis, eum Pontificem spectasse, tot jam allatis a capite ad calcem hujus Opusculi comprobantibus testimoniis unum adhuc adjungam ex Sadoleti ad Marcellum Cervinum Epistola: *Vides ipse profecto (potuisti enim iter faciens multa cognoscere) quanta in invidia simus apud omnes, quam male quisque de nostris moribus sentiat. Cui quidem incommodo remedium est opportunissimum, si præficiantur hi ecclesiarum administrationi, qui ad eas gerendas non cupiditatem quæstus, nec popularem pompam & jactationem, sed fidem, sed justitiam, sed religionem afferant. Quod quidem PAULUS Tertius Pontifex maxime omnium, quos ego noverim, Pontificum effecit. Est enim semper in cælum tollenda justissimis laudibus præstantissimi Pontificis virtus & voluntas. Tantæ vero PAULI III. laudi quo pacto nihil obfuerit Purpuræ honor binis nepotibus, tenera admodum ætate delatus sub Ejus Pontificatus exordia, & aliquot post annos tertio nepoti, pariter adolescentulo, jam satis superius explicavi, præsertim Cap. II. hujus Opusculi. At quoniam video morosos ejus facti reprehensores adhuc non defuturos, qui censebunt operam me in eo argumento tractando lusisse, placet hoc loco iisdem regerere par factum Pauli IV. qui licet summo jure agere in Ecclesiasticis quibus-*

vis

vis negotiis semper assuetus, attamen nactus inter Cardinales Robertum de Nobilibus, quem duoden- nem Julius III. ejus Avunculus eo honore decora- verat, adeo rem istam non exhorruit, ut vix inito Pontificatu, de illo novis honoribus augendo co- gitaverit, cui proinde, etsi decimum quartum vi- tæ annum nondum attigisset, Vaticanæ Bibliothe- cæ Præfecturam detulit, quæ (Ciaconii verba usur- pabo) *doctioribus, & antiquioribus vulgo commen- dari solet; tantum potuit apud sanctissimum sa- pientissimumque Pontificem consummata Roberti pietas, ut omnem ætatis defectum suppleret*. Id quod PAULI III. nepotum, dum Cardinalatum ac- ceperunt, ætati defuit, abunde pariter supplevisse eorundem virtutes, quicumque in dubium revoca- verit, is non de ejus tantum Pontificis perspicacia; atque sapientia male sentiat, oportet, sed de fide, de religione eorum omnium Cardinalium, quibus probantibus, imo efflagitantibus, adolescentulis il- lis tanti honoris insignia PAULUS III. festinasse com- peritur, ut certos nos reddit Romulus Amasæus in funebri Ejusdem Oratione, cujus Excerpta Appen- dicem, quæ statim subsequitur, conficient.

FINIS OPUSCULI.

AP.

APPENDIX

EX ORATIONE ROMULI AMASÆI

HABITA IN FUNERE PAULI III.

Libello hoc ad umbilicum jam ferme perducto, meas ad manus pervenit Romuli Amasæi Oratio habita in funere PAULI III. hodie admodum rara, quippe quæ non comparet inter reliquas ejus Rhetoris, ann. 1564. Bononiæ impressas. Operæ pretium itaque facturus mihi videor, si plura ex ea hoc loco proferam, unde quæcumque in superioribus Capitibus digessi, nova luce illustrentur, eorumque fides magis magisque adstruatur. Etsi enim norim funebres Orationes ex eo esse Scriptionum genere, de quo Cicero in Bruto ita sentit, *bis laudationibus rerum nostrarum historia est facta mendosior*; animadversione tamen dignum puto, in Romuli Oratione ista testes rerum in ea expositarum laudari S. R. E. Cardinales, ad quos eandem Romulus habuit, & rerum hujusmodi, quarum commemoratio nullum profecto decus PAULI III. memoriæ, multum vero infamiæ Oratori adportasset, si earum falsitas idonea fuisset, quæ vel ipsorum Auditorum, in augusto Confessu locum tenentium, subita inficiatione refelleretur. In iis autem excerptis afferendis eum ipsum ordinem sectabor, quem prætulerunt Opusculi mei Capita, per quæ proinde decurram, postquam quæ faciunt ad exornandos PAULI III. Majores, quorum scilicet mentio nullum in Opusculo locum invenit, recitavero. Eos in hunc modum Romulus commendat: *Atqui non clari tantum in Farnesia gente PAULI Majores fuerunt, sed beati opibus, ac plurimum oppidorum perpetua ditioe potentes, neque Roma-*

no-

norum tantum Procerum nomine nobilitati, sed ob res fortiter ac strenue gestas, in eos etiam, qui de rebus Italicis conscripti sunt, commentarios, atque annales magna cum laude relati. Nam ut abolitum jam fere vetustate magnum imaginum numerum præteream, fuit ex hac gente abhinc annos ferme CC. Petrus Farnesius, qui Imperator cum summa potestate justos exercitus ducens, in magna bellorum varietate insignibus claruit victoriis: idemque cum Florentinorum copiis præesset, in Pisarum oppugnatione, confosso ab hostibus equo, mulo invehctus, conservata pristina animi præsentia, per medias mœnium ruinas irrupit; consecutaque mox suorum multitudine, subito impetu captam, & expugnatam urbem Florentinæ Reip. tradidit. Fuit paternus PAULI Avus Ranutius, qui Eugenio IV. Pont. Max. periculosissimis temporibus, scissa in diversas partes Rep. fortem, ac fidelem Reip. vestræ operam exercitus Imperator navavit, quique Alfonsi Neapolitanorum Regis exercitus ingenti cum gloria rexit. Non possum sine impiæ quodammodo oblivionis nota Petrum Farnesium Ancaranum cognomento, clarum illum quidem in diverso genere laudis, & summa nominis celebritate virum, prætermittere, qui cum luculentas sibi fortunas ex juris civilis interpretatione comparasset, domum, & prædia Bononiæ reliquit, unde literatæ juventutis Collegium, quod adhuc ex ipsius testamento ad Farnesiæ gentis tutelam pertinet, aleretur. Patre genitus est Petro Ludovico, spectata fide, atque officio in Romanam Remp. viro. Verum non minus clarum, aut illustre fuit maternum genus. Lectissima enim femina Joanna mater ejus e Cajetana fuit gente, non solum prisca, sed etiam nobilissima. Ex ea certe Boni-
fa-

facium Octavum Pont. Max. fuisse constat, cujus multæ, ac præclaræ laudes literarum sunt monumentis mandatæ. PAULI igitur alterum genus Imperatorium, alterum Pontificium.

Aggredior nunc ad repetenda Opusculi mei Capita. Actum est in I. de PAULI III. in Latinis, Græcisque literis præstantia. Eximiam prorsus eam fuisse, pluribus Orationis suæ locis Romulus declarat. Et primo quidem: Cum (inquit) ab ipsis prope incunabulis, & eximiæ indolis ac divini prope ingenii certissimum specimen daret, immensoque literarum amore flagraret, & domesticos exquisitæ eruditionis magistros habuit, & jam puber Pomponium Lætum, Romanæ tunc Academiæ principem, audiuit assidue, & observatissime coluit. Tantos adolescentulus in optimarum artium studiis processus effecerat, ut, qui longo intervallo æquales omnes suos superasset, multo majoribus natu merito par esse videretur, cum clarissimorum in omni liberalium disciplinarum genere hominum fama allectus, Ficini, Policiani, Chalcondilæ, Lascaris, ad eos se Florentiam contulit. Quo tempore & cum Pico Mirandulano, admirabilis ingenii, & incredibilis doctrinæ adolescente, & cum Joanne Medice, qui Leo postea fuit X. cotidianus ei fuit usus, ac familiaritas, & suavissima in communibus maximarum artium studiis æmulatio. In Patriam inde reversus, cum Latine, Græcæque linguæ cognitione, atque iis omnibus disciplinis, e quibus constat pulcherrimus humanitatis orbis, omni prorsus ex parte esset perpolitus, ad publicos jam honores aggressus &c. Alio vero loco, de iisdem PAULI studiis hæc habet: Quidquid successivi temporis e maximis poterat occupationibus eripere, id totum ad eos legendos & pervolu-

lutandos Auctores conferebat, qui vel Græca, vel Latina oratione, quodvis divinæ, aut humanæ doctrinæ genus literarum monumentis mandassent; cuius rei maxime perspicua extant argumenta, sexcenta prope librorum volumina ipsius manu a primo ad postremum paginarum marginem politissime ac scientissime pernotata. Ex his ille fontibus dicendi, intelligendi, res maximas gerendi, præcepta hauriebat. Tandem prope Orationis finem, Si Latine (inquit) loqueretur, apte quidem ad nostri temporis consuetudinem, atque accommodate dici omnia intelligebam; sed ita, ut neque purius, neque elegantius veteres illos Latine lingue Auctores, qui sæculis eruditissimis floruerunt, locuturos fuisse putarem. Jam si Græcorum vel sententias, vel versus, quod in promptu illi erat maxime, pronunciaret, priscum Orationis Græcæ sonum, & plane Atticam vocum appellationem, mihi videbar agnoscere. Illum itaque cum audiebam, veniebat protinus in mentem, non cum iis tantum principibus viris, qui patrum memoria litterarum, atque eruditionis laude in Italia præstiterunt, comparari eum posse, Alfonso Neapolitanorum Rege, Laurentio Medice, Guidone Feltrio, Pico Mirandulano; sed tales tacita mecum cogitatione fuisse statuebam, vel Periclem illum Anaxagoræ auditorem, qui sapientia, atque eloquentia Atheniensium civitatem annos plurimos rexit, vel tam claros olim omni sapientiæ gloria apud Lacedæmonios Xenophontis Agesilaum, apud Thebanos Lysidis Tarentini præceptis Epaminondam extitisse. Quatuor ego Romanos principes & literarum exacta quadam cognitione emi-
nuisse in veterum libris comperio, Cæsarem Dictatorem, C. Cæsarem Octavianum, Aelium Hadrianum, M. An-

toninum, cognomento Philosophum. His ego omnibus tam fuisse litteris parem, quam, quod dubitari non potest, morum probitate ac sapientia anteisse PAULUM, censeo, atque omnino, quod Tacito Imp. aliquando Curiam totam acclamasse legimus, ad PAULI tempora multo justius reservari debuisse: Quis melius, quam literatus imperat?

Capiti II. argumentum præbuit PAULI III. nepotum in sacrum Cardinalium Collegium cooptatio. Hanc rogantibus, & efflagitantibus Cardinalibus, ac proinde potius eorum consensu & favore, quam Avi voluntate contigisse, Romulus in hunc modum testatur: *Quanta (inquit) in nepotibus quam liberalissime educandis, atque instituendis fuerit cura, atque diligentia, ex eo liquido constat, quod a præstantissimis doctoribus, atque optimarum quarumque artium magistris, & puerorum mentes honestissimis moribus, ac præceptis sine ulla indulgentia imbui, atque informari, & jam Adolescentium ingenia omni quæ Latina, Græcæque lingua literis mandata fuerit, vel intelligendi, vel dicendi facultate erudiri, instrui, atque expoliri voluerit; quod ipsemet & quid discerent, secum cum illos haberet, cotidie inspiciebat, ad omniaque vitæ officia certis rationibus, atque exemplis, teneram eorum ætatem fingeat, atque informabat; & tum per ipsos præceptores, tum per alios graves, ac optimæ fidei viros, quandiu & Bononiæ, & Patavii fuerunt, quo studiorum eos causa dimiserat, an in officio manerent, ut certior fieret, sedulo operam dabat. Certe rectissima institutionis solertia ad præclaram Adolescentulorum indolem adiuncta effectum est, ut non Avi magis voluntate, quam ingenti vestro consensu ac favore, præmaturæ virtutis præmiis fuerint decorati &c. Re-*
dit

dit iterum Romulus ad idem argumentum, antequam Orationem concludat, atque his utitur verbis: *Nepotes quidem suos, Alexandrum primum Farnesium, & Guidonem Ascanium Sfortiam, ex longo deinde intervallo Rhanatium Farnesium vix dum puberes vobis collegas dedit. Sed qua indole adolescentulos? quo ingenio? quam liberaliter, quam præclare instructos? quam supra omnem ætatis captum, cum multa rerum intelligentia, tum mirifica quadam communis sensus præditos excellentia? Et sane eos non modo vobis non recusantibus, sed rogantibus etiam, atque efflagitantibus dedit; & tam verecunde eos nominavit, ut facile apparuerit, vobis obsequentiore multo, quam nepotes ornandi cupidiorum fuisse. Quid vero potuit aut a vobis amantius expeti, aut ab illo elegantius decerni? Fuit hoc vestræ erga PAULUM observantiæ perspicuum argumentum. Fuit ipsius erga vos fidei certissimum pignus, firmissimum mutue benevolentiae vinculum. Et vero nunquam fuit quomobrem aut vos id expetisse, aut vestris ipsum precibus indulgisse pæniteret. Unum ex PAULI nepotum præceptoribus fuisse Jo: Petrum Crassum, tradidi in Diatriba, eumque ex Ughellii fide Bononiensibus adscripsi; ac modo adnoto, ejus patriam fuisse Coloniam in Diocesi Vicentina, ut comprobatur Jo: Baptista Sabbioni Tom. XIV. Opusc. Scientif. Transit postea Romulus ad laudandos tres alios PAULI nepotes. Neque (inquit) hos modo, quos præter avitæ severitatis reverentiam, præter ingenii indolem, atque educationis rectissimam rationem, sanctior ista Purpura & vestri confessus verecundia, ab omni vitæ pravitate facile potuit absterrere, & in virtutum omnium officio, ac veræ, solidæque gloriæ cursu continere, sed*

quid Octavius, quid Horatius Farnesii? quid Sfortia Sanctiflorius? Ab ipsa pene infantia, armis, & vitæ militaris consuetudine assuefacti, quid unquam non prudenter, non moderate, non ut maxime Romanæ juventutis principes deceret, fecerunt? Ordines, exercitusque ita duxerunt, ita imperarunt, ut non ætati veniam, sed factis prædicationem quæsierint. Priores duo, alter apud Cæsarem, apud Franciscum Gallorum Regem alter, diu fuerunt; & in tanta quidem gratia, ut Octavium Cæsar non magis quod ei filiam nuptum dederit, lectissimam, & omni muliebri laude eminentissimam feminam, Margaritam Austriam, ut generum diligat, quam virtutis ergo, non minus prope, quam Philippum Hispaniarum Regem, unicum filium suum, quem majestatis, & celsitatis causa nominavi, carum habeat, Horatium Henricus Rex Francisci filius, cui filiam desponderet, dignum duxerit &c.

Capite III. collaudavi PAULI III. æquitatem, atque sapientiam in negotio Schismatis Anglicani per Henricum VIII invec̃ti, tribus innixus rationibus, scilicet, quod execrationis Diploma ferme per quadriennium intra scrinia sua continuerit, quod illud non publicaverit nisi post perspectam Henrici Regis in humanis, divinisque omnibus juribus violandis pertinaciam, ac tandem quod in eo negotio nihil ab Apostolica Sede tentandum putaverit, nisi collatis cum Carolo Cæsare, cum Francisco Galliarum Rege, & cum Scotiæ Rege Jacobo consiliis, quos omnes certissime constat assensisse, ut diploma illud suis in ditionibus evulgaretur, ac publice affigeretur, deinde eosdem, ne illud effectu careret, sociâ arma Pontifici multis pollicitationibus obtulisse, quin tamen ad effectum ipsæ perducerentur, unice ob muras
Ca-

Caroli, & Francisci suspiciones. Quoniam vero negotium illud Anglicanum indictum reliquit Romulus in sua Oratione, placet locum ex ea excerpere, quo, in aliis negotiis conficiendis, justi, moderatique imperii laudem tam apud populos, quam apud Principes PAULUM III. sibi promeruisse, etiam ante initum Pontificatum, comprobatur. Eum ergo Romulus commendat, quod pro Pontifice, Italiae florentissimas Praefecturas scienter, & cum summa jurisdictionis aequitate rexerit, neque sine ulla modo suspitione eas, quibus praefuit, Civitates gubernarit, sed justi etiam, moderatique imperii eximiam laudem una universorum populorum voce reportarit, quem sex deinceps Pontifices Max. virtutis, atque optimarum artium merito carissimum habuerint, quem sui collegae miseris, & calamitosis temporibus patrem, & patronum sibi extitisse senserint, quem salutis certe vindicem suae Resp. cognoverit, quem Clemens VII. & Carolus V. primo secundoque itidem congressu conjunctionis inter ipsos confirmatorem & sequestrem, pacis constantissimum auctorem, pulcherrimarum actionum socium, atque adiutorem amantissime exosculati fuerint &c.

Capite IV. labores, longorum etiam itinerum, a PAULO III. senecta admodum ætate, susceptos pro publicis utilitatibus curandis descripsimus. Eos ipsos non uno loco prædicat, atque extollit Romuli Oratio; nam de Niciensi itinere hæc habet: *Reip. ductus caritate, & acerrimis Religionis tuendæ aculeis incitatus, omnem valetudinem, quin vitam potius ipsam censuit condonandam. Tulit vero longi, atque incommodi itineris optatissimum fructum. Perfecit enim cum rationum vi, tum mitissimæ orationis lenitate, & pertractandorum animorum peritia, ut*


pa

pactis in annos decem induciis, tantas, ac tam certas inter se conjunctionis significationes illi Reges dederint, ut, qui ocium, ac tranquillitatem expeterent, illas verbo inducias, pacem re futuram augurarentur, & qui rerum essent novarum cupidiores ad novas jam artes turbandi, ac rescindendi omnia se investigandas compararent &c. Paulo vero post agens de PAULI III. sollicitudine pro confirmanda concordia, quam inter Principes illos constituerat, Vicit igitur (inquit) omnem periculorum rationem perpetua erga commissos fidei suæ populos caritas, spei alacritas laborem minuit, religionis ardor, viæ & infensarum plerumque tempestatum incommoda omnia non patienter tantum, sed hilare etiam, & jucunde sustinuit. O virum prisca illa pietate, ac fide flagrantem! O memorandum omnibus gentibus ac sæculis pacis studium! Quo sane merito vix in priscis illis quidem Pontificibus, Lino, Cleto, Anacleto, Telesphoro, Urbano, Felice, Clemente, Marcellino, cæterisque, qui sanguine profuso, suam posteris in Christiana professione constantiam testatam reliquerunt, majus ullum potuerit prædicari. Tandem Ejus Pontificis curam in Christiana Rep. a Turcarum insultibus tuenda collaudat; at potius quam Romuli de eo argumento verba recitem, juvat ex Poli ad Camillum Ursinum Epistola hoc quoque loco testimonium laudare, unde docemur, PAULUM III. semel ipsi Polo affirmasse, nullum esse in Ecclesia patrimonium, quod ad suum usum, vel aliorum Ecclesiasticorum malit converti, quam ad Illustrissimorum Dominorum Venetorum usus in tali causa, & tempore; bello scilicet Turcico ingruente.

Restant Capita V. & VI. pro quibus illustrandis brevem tantum ex Romuli Oratione dabimus locum, quod

quod in PAULI III. gestis nihil compertius sit, quam quod iisdem Capitibus pertractatur, summam scilicet ejus Pontificis laudem fuisse in Cardinalibus deligendis, & parem istorum in vitanda assentatione, quoties de juvanda Rep. ageretur: *Fuit* (inquit Romulus) *nobilitas, & natalium splendor requirendus? Regio multos genere illustres adlegit. Fuit virtuti, fuit vitæ dignitati bonos habendus? Ex omnibus Italiae, ex omnibus Europæ partibus in vestrum ultro confessum accivit, atque invitavit, quibus vel ipse jampridem judicasset, vel minime dubia fama attulisset, primas honestatis, primas disciplinarum, atque optimarum artium laudes deberi. Fuit laboribus pro Rep. susceptis gratia referenda? Multi in hunc Ordinem sunt adsciti, qui studia, qui fidem, qui fortunas, qui ætatem totam in magnis, & gravibus Reip. negociis, ac muneribus consumpsissent, qui corpus manifestis difficillimorum, & insidiosorum plerumque itinerum, longinquarumque Legationum periculis objecissent, qui vitam denique, caputque suum vestræ, Patres, Curia devovissent, ac sanguinem etiam, minime inviti, dum ejus salutem, & auctoritatem tuerentur, profundere parati fuissent. Quare nil verius, quam quod fatetur vel Petrus ipse Aretinus, nempe ut electi a PAULO III. Cardinales non potevano nascere in tempo più opportuno, ne a i giorni di miglior Papa, ita PAULUS Pontifex non poteva dispensare le dignità sacrosante in più necessaria occasione, ne in più giuste creature. Petri Aretini testimonium istud integrum recitavi p. 82. & 83. mei hujus Opusculi.*

FINIS APPENDICIS.



NOI RIFORMATORI DELLO STUDIO DI PADOVA.

A Vendo veduto per la Fede di Revisione, ed Approvazione del P. Inquisitor del S. Offizio di Brescia, nel Libro intitolato: *De Gestis Pauli III. Farnesi, &c.*, non v'esser cosa alcuna contro la S. Fede Cattolica, e parimente per Attestato del Segretario nostro, niente contro Principi, e buoni costumi, concedemo licenza a Gian-Maria Rizzardi Stampatore di Brescia, che possi esser stampato, osservando gli ordini in materia di Stampe, e presentando le solite Copie alle Pubbliche Librerie di Venezia, e di Padova.

Dat. li 22. Maggio 1745.

[Gio: Emo Proc. Ref.

[Marco Foscarini Cav. Proc. Rif.

Regist. in libro a C. 6. al n. 41

Michiel Angelo Marino.







Querini, Angelo Maria,

Imago optimi sapientissimique pontificis expressa in gestis Pauli III
Farnesii ad primos tantum quinque annos eius pontificatus spectantibus

Brixia 1745

4 H.eccl. 642 y

urn:nbn:de:bvb:12-bsb10005447-3